

সুদর্শনচক্র



ব্রজেন্দ্রকুমার সিংহ



সুদর্শনচক্র

ব্রজেন্দ্রকুমার সিংহ

প্রতিশ্রুতি

SUDARSANCHAKRA
Stories in BISHNUPRIYA MANIPURI
By BROJENDRA KUMAR SINHA

© SUKHADA SINHA

পয়লা প্রকাশ : হোলি : ফাল্গুন ২৯, ১৪১২
মার্চ ১৪, ২০০৬

প্রকাশক
সুখদা সিংহ

প্রতিশ্রুতি
আশ্রম রোড, হাইলাকান্দি - ৭৮৮১৫১
আসাম, ভারত

মলাটর শিল্পীগ
শক্তি সিংহ
নুয়া দিল্লী

ছাপানি
শিখা ভট্টাচার্য
সাহিত্য প্রিন্টার্স
কলেজ রোড হাইলাকান্দি - ৭৮৮১৫১
আসাম, ভারত

রূপা আককুড়ি দশহান

শ্রীমণীন্দ্রকুমার সিংহ, ভারতীয় বনসেবা (অবঃ)

সভাপতিঃ বিষ্ণুপ্রিয়া মণিপুরী সাহিত্যসভা

সম্পাদকঃ অপরূপা

গিরকরে সামান্য খুৎতল এহান

লেখকর আর আর লেরিক

চক্রবৃদ্ধি (নাটিকা)
লেহাও ফুলগরে
এলার খুৎতল
ধ্রুবপদ
মেরাক সেরাক
কণ্ঠগিরো (নাটিকা)
পুংলল
মেইকেই (নাটক)
বিরহী যক্ষর এলাহান
জিনজিনি
পৌরেই (সম্পাদিত)
মেয়েক মেঠেল ১ম ভাগ (সম্পাদিত)
রস বিলাস
চিকৎলেই
সিকাডেইনি
বিষ্ণুপ্রিয়া মণিপুরী ছন্দ পরিচয়
আহির পানির পথগ
ফিরাল
জার্নাল
টোনাটিং

খনঞ্জয় রাজকুমারর লেরিক

রুবাইয়ৎ-ই-ওমর খৈয়াম
ডিগল আতহানল মোরে
মিকুপর চেরি ফুল
হপনর বাবুয়ানি
কিমে অয়া আছৎ ইকাইতাপি
লক্ষ্মী গিথানক (নাটিকা)
ভিক্ষা দেনে এরে আহিগিতৌ
কুরৌ আহান রবীন্দ্রনাথ
জোনাকহান বার কুসুমলেই
দুঃখ মাচুর হমাজক
রাজপ্রশ্ন (নাটিকা)
কালিদাসর মেঘদূত

কৃষিতত্ত্ব য়ারি ঔহান কবি সমরজিৎ সিংহই সম্পাদনা করল ঔবাকা বিদ্যারতন সিংহ ছদ্ম নাঙে ত্ৰিপুৰা চে-৭ নিকুলেছিল। কথাসাহিত্যিক ডঃ স্মৃতিকুমাৰ সিংহৰ দাবি য়াকৰিয়া য়ারি আহানৰ নাঙ চিন্তামণিৰ চিন্তা বুলিয়া থইলাং। দিগ্বিজয়ী পণ্ডিতৰ য়ারি ঔহান কনাকে বুজন আগৰ থতাৎত ছনেছিলুহান। না মাঙক বুলিয়া লেৰিক এহানাং দিলুতা। ‘শোকসভা’ বার ‘মইপাকসেনাৰ পাতাল প্ৰবেশ’ অপ্ৰকাশিত য়ারিহানি।

নিকুলেছিল য়ারিহান ঔহানি পাকৰিয়া শ্ৰদ্ধেয়া শ্ৰীমতী সুখজ্যোতি সিংহ, শ্ৰীমান চণ্ডীদাস সিংহ, ডঃ স্মৃতিকুমাৰ সিংহ গাছি বার আৰতাই দিলা উৎসাহ ঔতা কৃতজ্ঞতাল নিংসিং অউরি। ডঃ দেবেন্দ্ৰকুমাৰ সিংহ, সভাপতি, নিখিল বিষ্ণুপ্ৰিয়া মণিপুৰী মহাসভা, গিৰকে নাপাকৰিয়াও মোৰ ইকৰা ঠিক পাৰ। গিৰকৰে ধন্যবাদ।

ইকৰানিৰ ক্ৰম অনুসাৰে য়ারিহানি ছাপা অইল।

লেৰিক এহানৰ প্ৰুফ কল্যাণীয় শ্ৰীমান সন্তোষ সিংহ এম.এ. বি. এড. -এ চা দিল। “মাতল” — বানান এগ এসাদে অইতই।

শ্ৰীমতী শিখা ভট্টাচাৰ্যৰ প্ৰশ্নয় নাপেইলে মোৰ কুনো লেৰিকৌ ছাপা নাইলইছ।

*দিলীপকুমাৰ সিংহ জিংতা আৰ থাইলে দাদাৰ লেৰিকহান বুলিয়া হারৌ অইলইছতা কতিও।

কৃষিতত্ত্ব	৭
বেতাল পঞ্চবিংশতি	১৮
চিন্তামণির চিন্তা	২৫
সুদর্শন চক্র	৩১
দ্বিধিজয়ী পণ্ডিত	৩৮
শোকসভা	৪২
মাইপাকসেনার পাতাল প্রবেশ	৪৫

কৃষিতত্ত্ব

(মার্ক টোয়েইন গিরকরে বন্দনা করিয়া)

মি ডাঙর লেখক আগ অইতৌ এহান মি কনাক অইতেৎত মোর মামাকে হারপাছিল। মাস্টরে কানাহা দিলা ঔপেই মামাই মাতল - না খালকরি! সমাজহান হাবিয়ে তোরে ডাঙর লেখকগ বুলিয়া য়াকরতাই দিন ঔহান মাস্টর এতাই লাজপেয়া তোরে মুঙেদে ফেইতুপ অয়া আটে নুয়ারতাই ঔহান মি দিব্যচক্ষুগল দেহৌরি। তিন তেরং দুইশ বুলেছং ঔহানেতে কিতা অইল থাং! য়াত করেতে না মাতেছং নাই! শতদল মানে আহৌহান দল, অবাই নাগইহান থাঙ!

খানি ডাঙর অইলু। পদ্যর খাতাহান বুজিল। মামাই যেগ আইলৌ মোর পদ্য ঔতা হুন্সুয়ার। ফিজাং বেছেকুরা, কাছাড়র অতিথ, হরিবলা এ হরি যেগৌ আহকা। আমার ঘরে মানু আহানি বন্ধ অইলা। মামাক বাগিনাকরে দেখলে মানু লুকেইতারা।

আমার গাঙর গন্ধরাজ মামা মরতই বুলিয়া মানু এহান উনা অনিৎ যিতারাগা। সাধু হমেয়া কিতা কিতি করেব ঔবাকা মামাই মোর পদ্যর খাতা ঔহান নিকালেয়া পাকরানি অকরল। ঘরর মানু ঔতাউ অজভূত নাই অরতে। কাদানির ঔগদেতে নায়া মামারে গালেয়া ঘরেৎত নিকাল দিলা।

মামাই মাতল - সমাজ এহানর অংতা লাকতা এতা দেহরতা! এতা বিকার বাকারল সমাজর উন্নতি করতাইতা! ঔহানলহে সমাজহান দিনে দিনে গাতেদে হমা য়ারগা নাই।

মি ম্যাট্রিক দিলু বছর ঔহানাৎত হৌপাতল কবিতা ইকরানি অকরলু। এতাল আর আকগয়ো পদ্য না ইকরেছি।

কলি খই কলি খই খাঙহান কই কই।

সমাজর উন্নতি করানিৎ হাবিহান অই গই॥

মামাই মাতল - এতাৎত জিঙে, হবাকরে ইকরেকুরা আগ নিকালাতা চেইক সমাজহানাৎ।

ঠাকেইচলা যেননাম কর সমাজর কাম।

বেইনং ডেংগাল ছুটিকনে হিরিগাম॥

মামাই মাতল - তিতে সেইখাং দৌর বর পেয়া জরম অছংগ না! এহু,
কপালখিপা সমাজ এহানে তোরে নাচিনলাতাক!

ফেনকচু কুমাড়াই এক অয়া আছি চেই।

সমাজ এহানর হাবিয়ে মুঙ পথে পারা দেই ॥

জিংগাই ছেপতরে জিঙানিতে নুয়ারের।

দরপতে সমাজ এহানর উন্নতি করে দেৱ ॥

মামাই কিতাই কবিরাজ জেঠাবাং গেলাংগা। কবিরাজগ থাংতে কবিতার
য়ারি এতা হারপেইতই।

কবিরাজ জেঠাবাই পারেঙ আহান হুনিয়া মাতল — তোমার মামাক
বাগিনাকরে গবরর বরন আকেইগি দিয়া দিঙ। মুরগি ইঙইবতা। বামনগরাং
গেলাংগা। বামনগই মাতল — খুল্লৈইর গুল্লি খেয়া মি কানহান না হুনি।

ইসালপা আগরাং গেলাংগা। এতা গোষ্ঠ, অভিসার, সাজন, গৌরচন্দ্র
কিতাং যৌকরিয়া এলা দেনারকা। ইসালপা ঔগই করতানল বারানিরকা করল
আরো বেলা দিয়া আইলাঙ।

বাসকুলি আগ আহেছিলি ঔগরাং গিয়া পদ্য এতা হুয়েইলাংগা আর
ঔগই কাদানি অকরল। ‘মোরে বুলেইতা করে মন্ত্ৰ সলকরতারাতা’ বুলিয়া দিল
চিকারি ঔগং মানুহান পুলইলা। চুলর আগাদে জিংতা অয়া আইলাঙতা।

সমাজহানাং এমাটিকৌ মানু নেয়ইলাতাক! এতাইতে কিতা সমাজসেবা
করতাইতা!

আমার গাঙর অক্ষয়মোহন চৌধুরী বাবু বরাবালা মানুগ। আকখুরুম
ভারত সরকারর ‘কৃষিপণ্ডিত’ উপাধি পাছিলগ। এবাকা টাউনে ঘর দুয়ার হংকরিয়া
আছেগা। ধনেতে আছে, নাঙেতে নেই। বিদ্যাউ না তালকরেছে। মামাই মাতল-
গাঙঘরর এরে ভূত এতাই তোৱ এরে উচ্চভাবর পদ্য এতা নাউ হারপা দিতাই।
অক্ষয়মোহন বাবুরাং যিকগা। হাজারৌ অক, টাউনে থাৱ মানুগ। তা এতার
বিতরগ হংকরিয়া মর্মহান হারপেইতই।

দৌ কিতা হমা দিয়া অক্ষয়মোহন বাবুরাং গেলাংগা। অক্ষয় মোহন বাবু
আরাম চেয়ার আহানাং বয়া চাহা পিয়ের। ইংলিশ পত্রিকা আহান কাদা হানাং

আছে। আমারে দেহিয়া পত্রিকা ঔহান আতহানাৎ ধরিয়া চশমাহান পিদল। পত্রিকাহান উল্টাগদে ধরেছে। মামাই হমাদিয়া মাতল — এইগা, আজিকার পৌতে কিতা মাতেছি। এইগা গাছির সাদে গুণীবান মানু হাবি টাউনে বেলা দিয়া আইলাঙ, হৌগদে গাঙহান আধারে বুরদিয়া থাইল।

অক্ষয় মোহন বাবুয়ে মুকসি দিয়া মাতল — কইতে আজিতে মোর পৌ নাউ দেছি। দেশ এহান কিতা অযারগাতা দিনে দিনে। মামীয়া মানুর মান নেই।

মামাই কতাহান কাড়লয়া মাতল — ঔহানলহে আগেকার আৰ্য গিরিগিথানিয়ে মাতিয়া গেছিগানাই, দরাই লাম লইলা, চাকলাই বনে হমেইলা। আজি কালিকার শিক্ষিত বুলিয়া আকতা নিকুলেছি, ঔতাই জিঙে সমাজহান ধ্বংস করে নিতারাগা। মি ডাঙর, এহানল আটতারাতা গার ঠিকদিয়া। কইতে এইগারে হমা দেনে। হবা করে জাঙর ধুলি ল। এতা দৌ আকেইগিনা। হান্তে এইগা, এইগার সম্মান এহান হারপাকুরা সমাজে নেই। এইগারে স্বয়ং ভারতর রাষ্ট্রপতিয়ে চিনিয়া, গুণহান হারপেয়া কৃষিপণ্ডিত উপাধি দেছেগ। এহু, এইগারে ইমে সমাজ এহানে পাছরে আইতারাতাক। এইগা, মি মাতিং বুললেতে এইগারতাউ খানি দোষ আছে। এইগাইতে কিয়া নিজরে দুরেই করিয়া থছি। সমাজহানেউতে এইগারে পানা মনেইতারা নাই।

— আজি কালি, তি মাতর ঔসাদে, মানু ঠানা নাকরেকুরা আকতা নিকুলেছি। তানু মিটিং কিতা করলে মোরে সভাপতিগ নাউ দিতারা। কইতে প্রমোদিনী, তোর দাদাগাছিরে চাহা দেনে। হান্তে মি যাচিয়া মোরে সভাপতিগ দেই বুলতুগা। মিও ডি. পি. সি আগ না, অমাটিক লেই মানুগ নাগই। তিতে হারপাছং থাংতে অরতে মোরে এইগা বুলর নাই।

— না না, এইগা। এইগাই দুরেই অইলৌ আমি এইগারে দুরেই অনা দিলেহে নাই। এরে শৌ এগ বি. এ তামকরেছেগ। মোর বাগিনাক। এগই — কইতে পাকর এনে, তোর পদ্য ঔতা এইগার মুঙে পাকর। গুণীয়ে গুণীর গুণ হারপেইতারা। — এইগা, পদ্য এতা খানি ছনেদিক।

মি কতাহান আকতা পাকরিয়া অক্ষয় মোহন বাবুর মেইথঙ হানাদে চেইলু। মামাই মাতল - না এরি, পাকরিয়া যাগা।

অক্ষয়মোহন বাবুয়ে কতাহান ছনিয়া মাতল — ভাল ভাল। মি পদ্য এতা ঠিকপেইলু। শৌগলিতে না —

মামাই মাতল — এইগার কথাহান থেপকরানিহান পারা। এরে পদ্য এতাৎত এইগায় ঠিকপেইবাং কতহান এইগার নাঙে নিকুলক। চারিবেদে এইগারে কৃষি পণ্ডিত ডি, পি, সিগ সিচ্চিল নাগই, কবিগ বুলিয়াউ চিনবাতা। এইগাই খেতি বারি বুলিয়া পত্রিকা আহান নিকালেইক। এইগারে মহাসম্পাদক মণ্ডলীর প্রধান সভাপতিগ থইতাঙাই। ঔহানাং এইগার ফটো কিতা দিয়া পরলেই আহান করতাঙাইগ। সমাজহানে ঔবাকা এইগারে হাবির গজর ফিটাহান নাদিয়া নুয়ারতাই।

অক্ষয়মোহন বাবুয়ে মাতল - হাই খালকরিয়া চেইং।

— নানা এইগা। আর খালকরিল সময় নেই। এবাকাউ ঘুমে থাইতাং! পাকরনে তোর পদ্য ঔহান।

মি খাতাহান নিকালেয়া পাকরলু —

ফুলকবি খেয়া হাবি না থায়োনে ঘুমে আর।

ইমাই ডাহিরি ত্বরা করে রাধো বান্দাকবির খার॥

— আরতাউ আছে। পাকরনে বাগিনা!

বেলেই ফাকেইথম চারিবেদে পেই পেই।

ডিলকরিয়া সমাজহান নাকরিয় তুমি লেই॥

মামাই মাতল - এইগা, কিমে পেইলাং!

— ঠিকপেইলু। কবিতা এতাং ঠইগ আছে, সমাজর কথা আছে। কনাকে গোকুল কীর্তনীর এলা হ্নলু ঔতাতৌ সমাজর কথা আছিল। এতাং হৌপাতর কথা আছে থাংতে মিতে এতাই নিয়াম হবা অছে বুলুরি। খালকরুরিতা!

— এইগা, আর খালকরিল সময় নেই। কথাহান এপেই লমকরিক। এতা পদ্য এইগার নাঙে নিকুললে এইগার নাঙহান ফিটতই ঔহানাং হেবানিয়া ঔগ নাজ্বলতই! গোলাপসেনার কথা মাতুরিতা। তা জ্বলতই ঔহান আকখুরুম দেহানি মনেয়া অছুতানা! নাইলে মোরতাতে কিতা!

- মাতরাই মাহেইতে না বুলানিয়ো কিসাদে! মি বার হাদি এহান তীর্থং যানা মনাছুতা। মাহা কতহান থাইতৌ। আহে পড়িংগা।

- এইগা গীতাং মাতেছি শুভস্য শীঘ্রম। এইগা যিকগা কিংতাউ নেই, এইগার নাঙে শৌ এগই হাবিতা করে দিতই।

কথাবার্তা লয়ইল। প্রেসগ টটরলাং। আমার মানু আগই খুলেছে প্রেসগ। মলাটহানৌ লেপইল। খেতি বারি নাঙ এহান ঠিক নাপেয়া 'কৃষি বার কৃষক'

থইলাং। প্রধান সম্পাদক মণ্ডলীর প্রধান সভাপতি কৃষি পণ্ডিত শ্রীযুক্ত অক্ষয়মোহন সিংহ চৌধুরী ডি. পি. সি। অর্থহান ডিফিটেড পঞ্চায়েত ক্যাণ্ডিডেট। অর্থহান মলাটহানাং নাউ দিতাঙাই। মামাই মাতল - এইগা আছে, মি আছু - সুপ না খালকরি। এইগার চরণর ধুলি লয়া হবা করে সম্পাদকীয়হান হে ইকর।

মিও আরতি আহান মানস করিয়া সম্পাদকীয়হান এসাদে ইকরলু :

আমার বিমুগ্ধপ্রিয়া মণিপুরী এতারে আমি ক্ষেত্রি বুলিয়াতে মাতিয়ার। অর্জুনর পাঞ্চজন্য মইবঙগর রৌহান ছনিয়াউ ঘুমে থাইলাঙ। এবাকাউ খেতিরমা লেইত্রেংহান কম। জ্বর যুগ এহানাং চিংনা চিংনি অয়া চলতারা এহান দেহিয়া আহির পানি পড়ের। প্রমাণহান মটরর খেতি। আমি মটরর খেতিহে করিয়ারতা খেতি করানির পাখ থাপারানি ঔহানতে নাজানলাং। মটর ছিড়ানি নাজানি। ইমা চিত্রাঙ্গদার জিপুং আমি। বজ্রবাহনর রকত আমার শিংলেইং। আমি মটর ছিড়ানি নাজানিয়া কতিয়ো মটর একুচ মাংকরিয়ারতা। বিদেশে কিসাদে করতারা ঔহানাংত আমারতা হিকিলতা আছে। শৌ আগরে কেইরাক আহানল মটর জারিৎ কাকরে দেনা। ঔগই বাছে বাছে আকগ আকগ করে ছিড়িয়া খলেইগৎ বরানি। ঔহান অইলে তলে মটর পড়িয়া নষ্ট নাইতই। বছরে কই মণ মটর জাকারেয়া ছিড়িয়ার বুলতে মাটিং পড়িয়া থার। ঔতাল হিয়াল কুকুরে পেট বুজতারা। মটরর গাছ জাকারলে ভাইটামিন নষ্ট অর। জাকারাছি মটর ঔতা খেয়া, গ্যাস্ট্রিক থুঙইতারা। ঔহানে ... এসাদে ডিগলগ করে ইকরলু।

পত্রিকাহানর লেখক আকগ। মি। মোর পদ্য ঔতা কৃষি পণ্ডিত অক্ষয় মোহন চৌধুরীর নাঙে কতহান, মোর নাঙে কতহান বার এগর হৌগর নাঙে আহান দুহান দিলু। শ্রীযুক্ত অক্ষয়মোহন সিংহ ডি পি সি গিরকর নাঙে নিয়াম থাইল।

কৃষি বার কৃষক নিকুলিল দিন ঔহান মামাই সাইকেল আহানাং চড়িয়া ঘরে ঘরে বিলেইলগা। ডাকেউ এরা দিলাং।

পিছেকার দিন ঘরেংত নিকুলতে দেখরি মানুগ মাহেই পথগৎ বাসেয়া আছি। মোরে কুপ করে চেইতারা। মোরে দেহিয়া পথগ এরা দিলা। আগই মাতল — আহি ঔগিয়েদে চেই।

অহঙ্কার আহান হমেইল মোরতা। মি সামান্য মানুগ নাগই। এতা পারা লেখক আগ। মোরে দেহানিরকা পথে মানু বাসেয়া থাইতারা। কুংগদে পথগ

লালইলু মাতে নুয়ারতৌ। প্রেসগর মুঙে আয়া দেখলু তলেল খুড়া বাসেয়া আছে। মোরে দেহিয়া মাতল-বাসাতা, মি তোরে পেইং বুলিয়া এহান হাবি রইদ এহানাং উবা অয়া আছুগ। ইকরেছৎ এতা আকখুরুম পাকরতা। এরে বান্দা কবি কিসাদে খেতি করানি বুলিয়া ইকরেছৎ ঔহান।

মি পাকরানি অকরলুঃ আমার সমাজে গীতিস্বামী গিরকে আমারে হজাক করানি মনেয়া রাস, রাখোয়াল করিয়া গেছেগা। তা আমারে হজাক করানিরকা কওয়াগ অলয়াও রহিয়া চাছিল। আমিতে ইমাবাবার কথা নাছনলাঙ, গুরুজন না মানলাং। একাদশী না করিয়ার। গারিং গৌড়িয়া নেয়া চৌরিয়া অয়া বুলিয়ার। বান্দা কবি রুয়ানি কিসাদে ঔহান পেয়া নাজানিয়া আছি। আমার মানুষে আটেল পেইলাক পুরি লপুকে বান্দা কবির আঠি হিচিয়া খেতি করতারা ঔহান ভুল। বান্দা কবি রুয়ানির সময়হান আষাঢ়ে। অম্বুবাচী লালইতই দিন ঔহান বিহান হবা করে আলধরিয়া বান্দা কবির ডেঙ ঔতা আকেইগি আকেইগি পারেঙহান করে রুয়ানি। আঠি হিচিয়া রুয়ানির পদ্ধতি ঔহান বেলানিরকা আমি হাবিরেউ হেইচালাকচা করিয়ার। নাইলেতে বান্দা কবি খেয়া নিমোনিয়া অইতাঙাই সুয়াই...

—থাক থাক। মিও ইমে এহানেই পাকরলু। পাকরিয়া মিতে পাগল অছু সাং বুলিয়া খালকরিয়া। না, মি পাগল নাছু। পাগল নাছু - বুলিয়া হুংকার আগ দিয়া নাছনি অকরল।

এহু। গ্রামসেবকর চাকুরি করল মানু এগ এসাদে অইলতাক! সানিক কায়া পথে নাছেরতঃ

পিছেকার হাপ্তাং সম্পাদকীয়হান আরাকো হবা অইল। দিনে দিনে মোর উন্নতি এহান দেহিয়া মামা হারৌ অইল নিয়াম পারা।

‘আমি অর্জুনরে লালফামে জিঙেছিলাং মানু। তারে জিংতা করেছিটাউ আমি। আমার সমাজর কৃষ্টিকলা আজিকারতা নাগই। পৃথিবীহান সৃষ্টি অনার দিনেংত আছেতা। আজি গড়েইপা কেথকর কেঙুয়াঙুলিগল চলিয়ার, আমি দলাদলি কৌলিল কৌজিয়া অয়া কৌরঙগর সাদে অযিয়ারগা। কারণহান আমি ঠালি ঠালি বাতখানা জানি। চৌলর খেতি না জানি। এবাকাউ ধান রুয়েয়া ঔতা বানিয়া চৌল নিকালেয়া বাত রাধিয়ার। কতিহান সময় মাঙর ঔহানতে নাউ দেখলাং। পাঞ্জাবে আজি ধানর খেতি নেই। হরিয়ানাংতে খানি খানি আছে। ধানর গাছ ঔতাং অকসিজেনর ইনজেকশন দিলাক পুরি গাছ আকেইজার মাংকেইজার

পারা ডাঙর অর। গুয়া জারর সাদে উচর। বছরহান চৌল ধরের। গাছ ঔতার ডেঙেংত দারৌ পেইতার, তক্তা নিকালেয়া ঔতাল নৌ জাহাজ কিতা হংকরতারা। মরুভূমি ঔতাল চলতারা আরো পাঞ্জাবর ধানর গাছর তক্তার জাহাজরে মরুভূমির জাহাজ বুলতারাতা। ধানর গাছে ইনজেকশন নাদিয়া স্যালাইন দিলে গাছ ঔতা আরাকো ডাঙর অর। তক্তা ঔতা আরাকো দড়া অর। যেতাউ অক অকসিজেন ঔতা না হিচিয়া ইনজেকশনগ করে দিলা থাঙতে পরিবেশৌ নষ্ট নাইল। পরিবেশ রক্ষা করানি তানু জানেছি।

আমিতে বছর বছর অরে পাকে সানিয়া ধানহে ফলেয়ার। ঔতা খেয়া ম্যালেরিয়া অয়া, লিভারগ পচেয়া, আহিগ নষ্ট করিয়া নুয়ারা চেলয়া কুরু সুময়া থায়ার। এবাকাউ সময় আছে ধানর ক্ষেতি বাদ দিয়া চৌলর ক্ষেতি করানির।’

লেউ খেতি বুলিয়া ইকরলু ঔহানতে অতি হবা অইল। ‘লেউ খেতিহান পেয়া আমি নাজানেছি। আমার পৌরেইং মাতিয়া গেছিগা লেউয়ে মাছে। আমার আপা বপেয়ে, ইমা চিত্রাঙ্গদাই হারনাপেয়া ঔহান মাতে গেছেগাতা? য়েপেই মাছ, ঔপেই লেউ। মাছরমাউ বুয়াল। আমার পছরিরমা বুয়ালর পনা বেলেয়া ঔতার গুজগৎ লেউ আকেইজারি রুয়া দিলে লেউ ঔতাল মাছহান খেলা খেলা থাইতাই। লেউরমা ফসফরাস আছে, নিকোটিন আছে ঔতাউ পানিহানাৎ ধয়া য়িতৈগা।’

ইকরতে ইকরতে আহির পানি পড়িল। লয়ইতেগা দিলু - আমি ডেই ডেই হারা দিয়া কুরুসুময়া, থাইবাং ফাম নাপেয়ার। পেন্ট পিদিয়া মালঠেপে হমেয়ার। সমাজহান কিহান অইলতা! গিরিগিথানি, খালকরিয়া চেইক, নিঙলে আজি শাড়ি সেঙেল পিদিয়া চলতারা। এতা আমারে ইমা চিত্রাঙ্গদাই হিকাছেতা? বন্ধবাহনে পেন্ট পিদিয়া অর্জুনরে চহা চহা কাড়ল বিধাছিলতা?

মামাই মাতল, তলে খানি ফাম থাইল ঔপেই আধুনিক কবিতা আহান দে।

ইমা চিত্রাঙ্গদার সামপালথঙগৎ

এরিস্টটলর হজকারি।

কারে কুঙ্গই কার গাদিতারা আমার কুরুক্ষেত্রৎ।

মি ভগবানর লগে বয়া য়েন্নাম রুয়াউরি।

সমাজহানর কৃষক আমার কলাকৃষ্টি মুঙে দিয়া

খেতি কর বৌনানিয়া।

ইতিহাসে সা সা করে ইকরেছি

আমি বঙ্গের জরম জিপুত, কমতা নাগই।

মামাই মাতল - এতাহে আমার পাঠক সম্পাদকে বিসারতারাতানাই। আর চিন্তা নেই। সম্পাদকে তোরে ঠিক পেইতাই, আধুনিক কবিতা বুলিয়া যাকরতাই। তোরে প্রিয় কবিগ বুলিয়া সম্পাদকে মাততাই। আমার ঠার ইস্কুলে চলতই দিন ঔহান এতা প্রথমভাগর লেরিকে যেসাদৌ থাইতই।

কৃষি বার কৃষক নিকুলানিতে ফাতনেই, বিলেয়া লয়ইল। মামাই কিতাই পিছেকার সংখ্যার যারিদেনাং বইলাং। খানি থায়া বুজন আগ আহিল। মাতল - মি বিদেশেংত আহেছুগ। তোমার পত্রিকা এহান পাকরিয়া সম্পাদকগর লগে উনা অইং বুলিয়া আহেছুতা। মি হোমিপাখি ডাক্তারগ। মহাত্মা হ্যানিম্যানর কৃপাল পাগলগ মাহেই বালা করেছুগ। তুমি দ্বিয়গিরমা সম্পাদকগ কুংগ?

মামাই মাতল; এন্না মোর বাগিনাক শৌ এগ। কিয়া থাঙ? বহিক এনে।

— না, নাবইতৌ! তোর সম্পাদকীয় এহান পাকরিয়া কিংতাউ উপ নুয়ারিয়া গৃহিনী ঔগরে পাকরিয়া হুয়েইলু আরো তেই 'গাঞ্জা পিয়া আহেছতা বুলিয়া' ঘরেংত নিকাল দিল। আমার গৃহিনী ঔগ আইনর ডাটগ। মি সংকল্প করেছুতা সম্পাদক ঔগরে মারিয়া ফারাচিং যিতৌগা। নাইলে শান্তি নেই।

মামাই মাতল - ডাক্তারবাবুরৌ ফাগি হার নাপেয়ার থাংতে না! কৃষি বার কৃষক পত্রিকার সম্পাদকগ অইলতাই মান্যবর কৃষি পণ্ডিত শ্রীযুক্ত অক্ষয়মোহন সিংহ চৌধুরী ডি. পি. সি গিরক। তাতে এপেই নেই, তীর্থং গেছেগা।

— ঔহান অছেতা। আকদিনতে পেইতৌ নাই তারে। বুলিয়া মাংকলর খুটি ঔগিং জাংদাল কতহান দিয়া, কৃষিমুখ, কৃষিমুখ, আকখুরুম পেইং করে বুলিয়া নিকুলিয়া গেলগা।

ডাক্তার ঔগ নিকুলিয়া গেলগা আর মামাই মাতল -- এতাউ অরতে সমাজর মানু নাই! এতারেউ মনুষ্য বুলানি।

ডাক্তার ঔগ বার আলথক অয়া আহিল। মাতল — পানিরমা লেউ খেতি করানি বুলিয়া কুংগই মাতলতা? মামাই মাতল, ডাক্তারবাবুরে কিতা বুঝেইতু। এতারে মাততারাতা কবির রূপক। সাহিত্যিকর ইকরা। সম্পাদকর কলমগ। এতা নিরপেক্ষ অয়া ইকরেছেতা। লেউ মানে লেউ নাগই। লেউ বুলতে

এপেই পলিয়া বুলিয়া হারপানি। ডাক্তার বাবুয়ৌ পহরিগ বুলতে পহরিগ বুঝাং থাংতে কিতাতে বুলতু। পহরি মানে পানি, পানি মানে গঙ্গা, আমার ত্রিপুরাং মনুহানে গঙ্গাহান। এপেই মনুহানর কথা মাতেছি।

মি মাতলু - মনুহানর পানিং পলিয়ার খেতি করানির কথা রূপকল মাতেছি।

— পলিয়া মনুহানাং খেতি করানি বুলিয়া কুংগই মাতলতা।

— ফ্রান্সে যাগা। ছয়াংহো, ইয়াং সিকিয়াং, আমাজন ঔতাং বাব দিয়া পলিয়া রুয়াছি, য়েন্নাম রুয়াছি, টমেটো রুয়াছি।

— না, আরাক খানি থাইলেতে মিহে পাগল অইতৌ। না কিতা, পাগল অয়া হদেইলুতা। মহাত্মা হ্যানিম্যান গিরক, মোরে জিংতা কর। বুলিয়া কাদিল কাদিলগ অয়া নিকুলিয়া গেলগা।

পিছেকার সংখ্যার সম্পাদকীয় ঔহানতে ইমা চিত্রাঙ্গদার আহির পানির মা বন্ধবাহনর কারগ বুয়েয়া ইকরলু পারা।

আমি নিজরে বন্ধবাহনর বংশ বুলিয়া মাতিয়ার। কিন্তু আমার হাদিৎ কংস নিয়ামপারা আছি। আজি আমি সিনেমা চানা, মিয়াং ঠার টটরানি ঔতাল মেইকখুগ অয়া থাইলাং। শৌরে ডাক না হিকেয়া ইংলিশ ইঙ্কুলে দিয়ার। এতা আমারে আমার ব্রান্সি, রাজসি গাছিয়ে হিকাছিতা?’

এবাকা পেয়া আলু ছিড়ানি, মুন্লা ছিড়ানি নাজানিয়া থাইলাং, বেইনঙে চহা বেইনঙে দ্বিতা বুলিয়ার। বৈষ্ণব বুলিয়াতে গর্ব করিয়ার, কীর্তনে গিয়া কাদিয়ারগা, এগদে ধর্মর মর্মহান ধরে নুয়ারেছি। কর্মতো লেইথক অছি। মহাসভা সাহিত্য সভাতে করিয়ার, আলু ছিড়ানিতে নাজানিয়া থাইলাং। আলু এতা কৌরঙল ছিড়ানি থকর। মানু কায়া ছিড়িয়ারগা বুলতে গাছ বাগিয়া পড়ের।

মুন্লার কথাতে আর কিতা মাংতু। ইমা চিত্রাঙ্গদার খেলমাচির আঙেই বেললাং, এগদে থাচির দিনে মুন্লা খানা গম গমনেই আংকরলে অটর মাচি হেইকরে নুয়ারিয়ার। বানুকহান ধরানি নুয়ারের ঔগউ মুন্লা কাপাং যানা মনার। উপমা আহান দিয়া রূপকল মাতিং বুললেতে, কাঙহানাং বাঙবাঙেইতেগা খাঙ লাগিয়া পাঙছি। পথে পড়িয়া মাত মাঙছি। এরে টাংখেই সেঙ যুগ এহানাং পিছনে পড়িয়া থাইলাংতা কিয়া। ঔহান হারপাদিক। মুন্লার হৌং কিতা বরেইলে মেঙর! ইমা, চিত্রাঙ্গদাই, বন্ধবাহনে খেইলা চাকচা ঔতা নাবেলেইক। আগাদে

মাকাকলেই না গিঠিক।

মুন্নার ডেঙ ওতা বানুকল কাপানি। ডেঙগর খানি গজে কাপলে নুয়া ডেঙ নিকুলিয়া ওতাং বার মুন্না ধরের। চারিবেদে ডেঙ শিলয়া ধরের মুন্না ওতারে শিলঙি মুন্না বুলতারা। শিলঙর খাসিয়াই, জুমর কুকিয়ে যেহান জানেছি ওহান পেয়া আমার সমাজনিংপা বুলিয়া মাতিয়ার এতাই নাজানেছি। স্বর্গং গিয়া ইমা চিত্রাঙ্গদারাং কিতা বুলিয়া খুমকরতাঙাই ওহানতে আকগয়ো বৌ না পড়িয়া ঠেটু বাগিয়া ডাঙর ঠেকহানল ঠিক দিয়া আটিয়ার। এতা ঠিল মানুর স্বভাব। নিরালহান ঠিপ করিয়া কানা নেই। আমারে কুংগই ঠেমকরতাইতা! আজি আগরে আগই না ঠেলা দিক। দিয়াতে চেইলাং নাই। বন্দবাহনর আতর বানুক ওহান ধরিয়া মুন্না কাপানিং পালহান অয়া পালইক।

মামাই কাদিয়া মাতল - এতাহে সাহিত্য নাই।

এরে সম্পাদকীয় এহানল 'কৃষি বার কৃষক' নিকুলিল দিন ওহান মাদানে মানু আগ আহিল।

— কুংগ থাঙ মূর্খ সম্পাদকগ তুমি দ্বিয়গিরমা। মামাই মাতল - তিতে বার কুরাংত আইলে দৌ বেইনংগ থাঙ?

— মি অক্ষয় মোহন চৌধুরী বাবু ডিপিসির জাঙাকগ। ইটানগরে থাউরিগ। কৃষি বার কৃষক পাকরিয়া পাগল অনা বিংতা অয়া আইলুতা। হাই! তুমি করলাই এহানতে!

— কিতা করলাঙ তা?

— মোর হৌরক এতাপারা কৃষি পণ্ডিত ডি. পি. সি আগরেল পত্রিকা নিকালেয়ার বুলিয়া এহান করতাইক!

— কিতা অছেতা মাত বেনাই।

— এতা কৃষিতত্ত্ব বার সাহিত্য বুলিয়া ইকরেছতা। মোর বাপকরেল করলৌ এমাটিক দুঃখ নাপেইলুইছ, আকগ হৌরকগ, মানীয়া মানুগ, তারেল পত্রিকা নিকালেয়া—

— এতা কৃষির উন্নতি করিক বুলিয়া, সমাজর উন্নতি, সাহিত্যর উন্নতি

.....

— এসাদে পাগালা পাণ্ডলি ইকরিয়া?

— 'হেই লেউর ডেমগ, ওল কবিগ! তিতে হৌরকর সালে মালক

বাপক এরা দেহুগই সাহিত্যতে কিতা হারপেইতেইতা?

— পাঞ্জাবে ধানর গাছে অক্সিজেন ইনজেকশন দিতারা বুলিয়া কুংগই মাতলাতা। ধানর গাছ ওঁতা মাংকেই জার পারা অর - ওঁতাং চৌল ধরের

মামাই মাতল - সবুজ বিপ্লব, আসাংপা বিপ্লব কিতারে বুলতারা হারপাছতা, তিতা কাড়লগ। তোরে তিতা কাড়লগ বুললে তিতা কাড়লর অপমান অর। তিতে উসেইগ না। সংখ্যাহান লেহে মোর বাগিনাকরে দূরেইত মানু এহানে চেইক বুলিয়া থাইতারাতা..

— সুপ কৃষির রেঞ্জু আগ হার নাপাছতাই কৃষিতত্ত্বল প্রবন্ধ, কবিতা ইকরিয়া...

— তিতে কুকীর মুখখিগ না। যাগাতা আমার ঠারর কুন পত্রিকাহানাং জানিয়া হারপেয়া ইকরতারা আগ নিকালাগাতা! সাহিত্য নাজানে ওঁগই লেখকগ, সম্পাদকগ, যেগই কবিতা ইকরে নুয়ারের ওঁগ আধুনিক কবিগ। আহান ইকরতে তিনহান ভুল করের ওঁগই প্রাবন্ধিকগ! ছন্দর বিন্দু বিসর্গ না জানে ওঁগই ছন্দল ইকরের। বানান ভুল করতারা ওঁতাই ভাষাতত্ত্বল ইকরতারা, ইতিহাস কিতারে মাততারা ওঁহান হারনাপাছে ওঁগই ঐতিহাসিকগ। ব্যাকরণ না তামকরেছে ওঁগই বানান লেপকরেদের। ওঁহানেহে আমার মানুয়ে আগরে আগই লালফামি বেইবুনি বুলতারানাই। লালছে পদফামহানাং আছে ওঁগ লালফামিগ। হারপেইলেতা উ-মাংক্রাগ। সুপ ধর্ম নাজানিয়া ধর্মতত্ত্বল ইকরতারা। ওঁতারেউ মাতগাবেনাই পারলেতে! পুলেই মালপিগ, কুমাড়ার ডেমগ। মোর বাগিনাক অইলতাইতে পর্থানিং আহেছতা! খনতুমগ। বাগিনা, খনতুমর পদ্য ওঁহান দেতা।

সমাজর কাম কর খনতুম আগ খমকরিয়া।

খলগ খেয়া খলেইগল মুঙে সালই খঙ লালয়া।।

— কিংতাউ হারপেইলেতা? তোর হৌরক খবল ওঁগরে মাতিছ - আমিওঁ আর কৃষি, কৃষক এতাল না খালকরতাঙায়। মোর বাগিনাক এবাকা নাঙ করা লেখক আগ। এখুরুমত আধুনিক কবিতা ইকরতই। বিদেশী সাহিত্যল আঙয়েয়া যিতইগা। পারলে তোর হৌরক বেরেণ্ডি ওঁগরে খামকরক বুলিছ।

বেতাল পঞ্চবিংশতি

বেতালে য়ারিহান অকরল — মহারাজ! দেশ আহানাৎ রাজা আগ আছিলতা। রাজা ঔগ প্রজারঞ্জক, সুবিচারক বার দেব দ্বিজর প্রতি ভক্তিমানগ আছিল। তার দেশ ঔহানাৎ তল মানু আকগৌ নেই। হাবি ডাঙরিয়া, হাবি নাঙকরাতা। প্রজাই কাম নাকরতারা। ফেইচম পিদিয়া সমাজ সেবা করিয়া আটানি, ঠুকরলে য়ারি জেলেইর ফুংকাৎ বয়া আরতারে তল করিয়া নিজে ডাঙর অনা, এতাই তানুর কাম। আরাক ডাঙর কাম আহান করতারা ঔহান অইলতাই দলাদলি। যেতালৌ আকতাল দলাদলি নাকরের ঔগরাং কইনা দেনাহান পেয়া নাকরতারা।

জোনাকহানাতে ছকাহান আছে। ফুলগতৌ কাটা আছে। চৌলরমাউ ধান থার। ধানহানাতে মহরিয়া থার। এসাদে শান্তি সুখর রাজ্য এহানাতে অশান্তি আহান আছে। দেশ ঔহানাৎ বামন আগ আছিলতা। ঔগতে মহা দুরন্তগ, ব্রহ্মরাক্ষসগ বুলানি য়াকরের। বামনর বিদ্যা না তালকরিয়া চর ডাকাতির লগে তিলয়া স্বভাবহান নিয়াম থিয়ো পড়িলগা। কনাকত মানুর মইচ গোরু কুয়রে দিয়া বিড়ি পিনা হিকিয়া দরি চরকরানি, পারন চরকরানি, ছপি চরকরানি অকরল। খানি ডাঙর অয়া গাঞ্জা পিনা হিকিয়া মহা পরলেই আহান। তা করের উৎপাত এতাৎ রাজ্যহানর মানু হায় হায় করানি অকরলা। মানুর ধান কাপিয়া নেরগা, এগর গুরু, হৌগর মইচ বেছে দেরগা। চাতলেৎত ধানর মুঠি নিয়া দেরগা, পছরির মাছ, গাছর গুয়া আকতাউ তার সালেদে থনা নুয়ারতারা মানু এহানে। কিংতাউ মাতেউ নুয়ারতারা বামনগ থাংতে।

— এইগা, বানেছু চৌল এগি নানেদিগানে' বুলিয়া য়ারি জেলা আগই মাতানিতে ফাৎ নেই, — অ! মি বামনগ, ব্রহ্মগই নিতেগা য়ারৌ করৌরিতা! এরে শিরাপ দিয়ৌরি, আকগ পুতক পাছৎ ঔগ মরক। জনম জনমে য়ারি অইছ — বুলিয়া চিকারি দেনা অকরলতাই জেলা ঔগই বামনগর জাঙে দরিয়া হমা দিয়া মাংল — মি জেলা মানুগ, অবলাগ, ঙাককরে দিক এইগা। মি লালইলু।

— ব্রহ্মশাপ আলথক নার ঔহানতে হারপাউরিতা! কানহানর আংটি

ঔগ দিলেতে কই কিগই জানে।

জেলা ঔগই কানহানর আংটি ঔগ কাড়িয়া দিয়া লগে মহাদেবরাং কাংকরানিরকা পইসা সিকি আগ দিয়া শিরাপেংত মুক্ত অইলি। বামন ঔগই কাংকরানিরকা সেলকমর গেই আগ কাড়লয়া আনেছেগা ঔগ মানুর নুয়া ধানে এরা দেবরাং। এসাদে অইতে অইতে লপুকে ধান নেয়ইল। আশ্বিনে দেশহানর লপুক ইদুম দুয়াগ অইল। আগ্রনে দওয়া নেয়ইল, মারা নেয়ইল, ধান বৌদানি নেয়ইল। পৌষে দেশহানাং ডাঙর নিদান আহান পড়িল। কনাক বুজন, ইমা ইন্দল এহান নাহানিয়ে আকয়া কাটাগ অইলা। এতার গজে বামন এগই দেব যাতনা এতা খাংকরানি। মানু এহান কিহান করতা কিহান নাকরতা পথ বিসারেয়া নাপেইতারা। এহানরে মাংতারাতা আপদর গজে কামপং। নিদানহানর জ্বালাহান বুলতে বামনগর জ্বালাহান। আকতারে আকতাই জিঙাজিঙি নেই। এ নিদান এহানাং কুনো আগই চৌল লপ আহান পেয়া বাতগুলি খেইলে — অবাই তুমিতে বারনে ধান থয়া ব্রহ্মসেবাং নাদরাইতা বুলিয়া — যেতা পার ঔতা কাড়লয়া নেবরাং বামন ঔগই।

সুপ নাইল ঔবাকা বুজন হাবি মালঠেপগং বইলাগা। বয়া আগই আহান মাংতারা, আরাক আগই আহান মাংতার। আগর কথা আগই হানি নাকরতার। লয়ইতেগা আগই মাংল — এতা জেলেইর দোষে অরতা। জেলেয়ে যাং কাকরানি নাকরতার। পাপ ঔহানে দেশহানাং বামনর তাপিত্র পড়িলতা। আগই মাংল, পেয়া মাংলেগাক। এবাকা জেলেয়ে সেগুল পিদিয়া টাউনে আটতার। অবাই কি পরলেইহান থাঙে!

হাবিয়ে চুমছে বুলিয়া ঘরে গেলাগা। এগদে যুবকে মাংলা — চেইক আমি কিহান করে পারিয়ারতা। ঔতা বুলিয়া গো ব্রাহ্মণ সুরক্ষা বিরোধী সমিতি আহান হংকরিয়া আগরে সভাপতিগ দিলা। কতদিন থায়া সভাপতির পদফামেংত কৌলি লাগিয়া দ্বিদল অইলা। আকতাই গোমহিষ ব্রাহ্মণ সুরক্ষা বিরোধী সমিতি আহান হংকরিয়া রাজা গিরিরাং সালইলা। এতা সালৈলাহান হারপেয়া হৌতাউ সালইলা। দ্বিত্যতাই দরখাস্ত দুহান ধরেছি। রাজসভাং গিয়া আকতাই রাজারাং দরখাস্তহান দিতেগা হৌতাই তানুর দরখাস্ত ঔহানল এহান জাতা দিলা। এতাই মাংতার। রাজা গিরি, আমার এহান তামকর, হৌতাই মাংতার। — রাজাগিরি, আমার এহান তামকর। হৌহান ফারিয়া বেলাদে।

হৌতাই চিকারি দিয়া মাংলা — রাজাগিরিয়েতে কিয়া আমারহান ফারতইতা!

তুমি সমাজ বিরোধী দলহান, তোমারহানতে রাজা গিরিয়ে কিয়া পাকরতইতা!

— কারে সমাজ বিরোধী বুলরাইতা! তুমি হে সমাজ বিরোধী নাই। এতাত কৌলি আহান অয়া আকতার দরখাস্ত আকতাই ফারে দিয়া ঘরে আলথক অয়া আইলা।

গাঙে আয়া আরাক কৌলি আহান দিয়া সভাপতি আগরে অব্যাহতি দিলা। অব্যাহতি দিলা সভাপতি ঔগই আরাক দল আহান হংকরল।

এখুরুম দল তিনোহান রাজাগিরিরাং সালইলা। রাজার মুঙে গিয়া দিলাগা কৌলি ঔহানাং রাজাগিরিয়ে তানুর কথা কিংতাউ হার নাপেইল। হাবিরে মাতল — তুমি আরাক আকদিন আয়ো।

বুজনর দল ঔহান রাজাগিরিরাং গেলাগা। গিয়া মাংলা — রাজাগিরি বুজন থাইতে আর যুবকর কথা নাহ্নবাং।

এতার কৌলি দেহিয়া খানি হাংকই অছিল বামন ঔগ আরাকৌ ভয়ঙ্করগ অইল। এবাকাতে বারনর ধান থাইলে ঔতা নেরগা, নাপেইলে বারনর খুটি ঔতা কাড়িয়া নিয়া দেরগা। গুয়ার গাছ কাপেদের — গুরু মইচ গাঙহানাং নেই বুলিয়া নুঙেই নায়া গুরুর কলে জ্বি লাগাদের। মানু এহান কিহান করতা, কিহান নাকরতা হারপা নুয়ারলা।

আকতাই মাততারা অনশন করো, আকতাই মাততারা ঠালি ঠালি বাত খেই। কতগই মাতলা — নিদান এহানাং নিককাউ অনশন করিয়ার, ঠালি ঠালি বাততে কুরাংত পেইতাঙ!

আকতাই মাততারা মৌন মিছিল নিকালেই, আকতাই মাততারা বামনগরে মূর্দাবাদ ধ্বনি দেই। আকতাই মাততারা বন্ধ ডাহো, আকতাই মাততারা বাজার খুলা থই। আকতাই রেল রোকো ডাকলা। ঔবাকা সিং মানু ঔতাই তানুর কুটুম কাছারে যানা নাদলা রাজার সিবয়ে নংমেই গাদদিতাই বুলিয়া। রটেইলাতাই গুঠি নিকুলেছে। মাদান পরে ব্যানার আহান নিয়া রেল লাইনগং কুপিয়া তানুর কুটুম কাছারে বহা দিয়া ফোটো তুলিয়া থইলা।

এগদে ব্রহ্মরাইক্ষস এগ আরাকৌ সাংঘাতিক অইল ঔপেই গুপ্তচর আগই বামনগর যারি এহান রাজার কানে বেললগা। ঔহান হুনিয়া রাজাগিরি জ্বিগ অইল। এহানতে বার কিহান! মোর রাজ্য এহানাং এসাদে মানুয়ৌ আছিতা!

— সেনাপতি!

— রাজাগিরি!

— বামনগরে রাজসভাং আনোগা। বাধিয়া নানিয়ে। ইমে ডাহিয়া আনোগা।
বামনগরে রাজার সিবয়ে বন্দী করিয়া নেছিগা বুলিয়া পৌহান রটিলতাই দেশ
ফুকয়া শৌ, বুজন, জেলেই, মুনি, গাবুরাপুয়েই, পুরি জেলেই এহান মেকহান অয়া
রাজ দরবারে সালইলা।

রাজা গিরিয়ে মাংল — হাঃ! বামনগ আনোগা বুলতে এতাহবি মানুতে
কিতারতা? এতা হবি মোর প্রজা? তিতে কিসাদেগ?

— হাই রাজাগিরি, মি সভাপতি, প্রজাস্বার্থ সুরক্ষা সমিতি।

— তিতে।

— রাজাগিরি, তা মাতল ঔহান নাগইহান। মি প্রকৃত সভাপতি, প্রজাস্বার্থ
রক্ষা সমিতি।

— রাজাগিরি মি এক্স-প্রেসিডেন্ট প্রজাস্বার্থ সংরক্ষণ সমিতি।

— রাজাগিরি! মি বর্তমান প্রেসিডেন্ট প্রজাস্বার্থ মহারক্ষা সমিতি।

— রাজাগিরি তানু নাগই, আমার এহানে আসল প্রজাস্বার্থ সংরক্ষণ
সমিতিহান। আমিহে প্রকৃত প্রজা। মি তানুর প্রেসিডেন্টগ।

— নাগই রাজাগিরি, তাতে অব্যাহতি পাছে সভাপতিগ।

— রাজাগিরি মি প্রজাস্বার্থ সুরক্ষা সমিতির রাজ্য সভাপতিগ।

— রাজাগিরি মি এনা থাইনাকার সভাপতিগতে।

আগই চিকারি দিয়া মাতল - তিতে কিতার সভাপতিগ। কুনদিন অইলেতা?
তা নাগই রাজাগিরি মি সভাপতিগ।

ঔতাৎত ডাঙর কৌলি আহান দিলা। ঔবাকা আগই মাতল বাসেই
বাসেই কৌলি না লাগিয়ো। এজেগুং পড়িকগা। মি সর্বপ্রজা উন্নয়ন সমিতির
সভাপতিগ হিসাবে কথাহানর অকরাগ দিং।

আকতাই মাতলা — বর বাগরর অকরা দেকুরাগ নাগই। রাজাগিরি মি
লেইকেই কমিটির সভাপতিগ। মি মাতিং।

— তিতে কিয়া মাততে! রাজার মুঙে নাঙ কামানি মনারতা! পাংগ
নাগই।

— রাজাগিরি, এতা হাব্বি মিনামপা সভাপতি। মি সর্বজন হিত সমিতির
মূল সভাপতিগ। বার দিয়ার য়ারি এতা হাব্বি এজেগুর বিতররতা।

— রাজাগিরিরে বিভ্রান্ত করানি মনেয়া মাতেরতা। সর্বজন হিতসাধন সমিতির সভাপতিগতে মিহে নাই। মি থাইতে আর কুংগই সভাপতিগ অপারতারাতে চেষ্টক।

— কিতা বুললে! ঔতা মানু করে গণ্যতানাকররতা! কইতে ভুবন সিং, লাঠি ধরোনে, কিতা চারাইতা!

রাজা গিরিয়ে মাংল — বাসেই বাসেই। দা, লাঠি, জাঠি না নিকালেয়ো। সভাপতি নিয়াম অইল মাহেই হবা। আমার কাদার রাজ্য ঔহানাৎতে আকগ সভাপতি। আমার তাতে মানুগর লেহে সভাপতিগ। ভালো ভালো — বুলিয়া রাজা গিরিয়ে কাদে বেলল। আহির পানি পুছে দৌরি বুলতে মিনাই ঔগই রাজার আহিগৎ সামাতুহান বরা দিয়া রাজাগিরিরে দুঃখ দিলো আরাকৌ। বড়পাত্রই মিনাই ঔগরে কানাহা আহান দিল জুগৎ করে। রাজাগিরি কতহান থায়া মাতল — আমার কাদার রাজ্য ঔহানরে আমি আকতাদে জিঙে নুয়ারলৌ সভাপতিয়েদেতে জিঙেছি।

প্রজা হাবিয়ে আতর সপা দিয়া মাতলা — জয় রাজাগিরির জয়।

— রাজাগিরি! মোর পরিচয়হান দিৎ, মি ভাবক সমিতির সভাপতিগ।

— মি থৌপু সমিতির সভাপতিগ।

— মি লেরিক দেকুরা সমিতির সভাপতিগ।

— মি অর্থ দেকুরা সমিতির সভাপতিগ।

— মি সেলকম বেছেকুরা সমিতির সভাপতিগ।

রাজা গিরিয়ে ছনের মাহেই ঙাকর। হাদিৎ আংকরল ঔরে আগই কাকালি হানাৎ ফিটাহান বাধিয়া আহেছে ঔগতে?

— হাই রাজাগিরি, এ মানু এগই আরাক সভাপতি আগর ফিটাহান কাড়লয়া আনেছে ঔহান তারাৎত বার কাড়লয়া নিতাইগা বুলিয়া কাকালিহানাৎ বাধিয়া আটেরতা।

— ঔরে ইমাইন্দল আগ কৌলি করিরি ঔগতে?

— হাই রাজা গিরি, তেই জেলেইর কিতা আহান হংকরিয়া সভাপতিগ আছে। তেইরে নাকরতারা ইমা ইন্দল ঔতার ঘরর বুজন ঔতারে হাইতাই নাগইতাই মাতিয়া ঠারেইরি ঔহান ছনিয়ারতা রাজাগিরি!

— হানতে ...

রাজা গিরিরে কথাহান লইকরানি নাদলা। মাংলা — রাজাগিরি থাইলাং

সভাপতি এতাত্বে -

— তুমি হাবি সভাপতি? হানতে তোমার সদস্য মেম্বার কিতাতে?

— রাজাগিরি আমারতারমা মেম্বার নেই। মানু আকেইগিয়ে কমিটি আকেইহান। কমিটিহান লেহে সভাপতি।

— ধন্য মোর রাজ্য এহান, ধন্য মোর প্রজা এতা, ধন্য ধন্য সভাপতি হাবি। হানতে বামনগর বিচারহান অকরিক বেনাই।

ঔবাকা আরাক কৌলি আহান দিলা। এগই মাতের মি সভাপতিগ, মি মাতানি, হৌগই মাতের মি সভাপতিগ মি মাতানি। তানুর লৌ চিকারিয়ে কিংতাউ আহান হারপানি নুয়ারল রাজাগই। বরপাত্রই মাতল — সভার হৌনাবিহানতে থই বেনাই।

সভাপতি এতাই কথা ঔহান নাউ হুনেদিতারা। যেতাউ অক মন্ত্রীগই হাবিরে তেমেজেয়া ইমপানি করুয়েইল।

রাজাগিরিয়ে মাতল — আর তোমারাংত না হুনেউ অইতই। মি হাবি হুনেছু, হারপাছু, আর হারপেইলতা কিংতাউ নেই। সাক্ষীপ্রমাণৌ নালাগের। আকগ বামনগই এতাহাবি সভাপতি এতারে হিনদের এহানাং বামন এগ লালছে। মোর সভাপতি প্রজা এতারে শান্তিহান নাদের বামন এগর শান্তিহান...

মন্ত্রীয়ে কথাহান থেপকরিয়া মাতল — রাজা গিরি খানি বাসেইক। ঔতা বুলিয়া রাজার কানহানর কাদাং থতাহান নিয়া টু টু করানি অকরল। মন্ত্রীর দাড়ি ঔতা রাজার নাকেদে থতাদে হমেইলগা। রাজাই সেচানিরকা করে মাহেই মন্ত্রীয়ে কাদাং চেপর। জারে নুয়ারিয়া রাজাই আকসিয়া বেলল। রাজপণ্ডিতগই পাঞ্জিহান চেয়া মাতল — রাজা গিরিয়ে আকসিয়েইল খেলতাম এহান নিয়াম হবা আছে। রাজ্যর মঙ্গলহান অইতই।

রাজাগিরিয়ে বামনগরে মাতল — হে বামনগ, ব্রহ্মগ, এরে হমাদিয়ৌরি ইবুঙো। ইবুঙোরে কিতাউ বুলতু, কিতাউ বিচার করতু। হাইদে, কথা আহান আংকরিং। ইমেতে ইবুঙো কিতা করর?

— মি নিখিল ব্রহ্মগায়ত্রী মহাসম্মেলনর সভাপতিগ।

— হুনো, হুনো, গিরিগিথানি, মি রাজাগিরির কথাহানি, হারপেইলগই হারপানি, হারনাপেইলগয়ো হারপানি। আজি এরে রাজসভা এহানাং বয়া যাথাং দিয়ৌরি — আজিৎত বামন এগর পদবীহান আর নেয়ইল। বামন এগরে তার

সভাপতি পদ ঔহানাৎত অব্যাহতি দিলাং।

বামনগই মাতল — পদবীহান নেয়য়া জিংতা অয়া থায়াতে কিতা করতু!
রাজাগিরি মোরে আরাক শান্তি আহান দিক।

রাজাগিরিয়ে মাতল — রাজার যাথাং বার হাকিমর হুকুম লড়িয়া ঔনা নেই। যেদিন রাজার আদেশ ব্যর্থ অইতই ঔদিন মাছ হাবি পানিৎত টেকাং কাইতাই, টেকার জীব পানিৎ লামতাই, দিনহানে রাতিহান অইতই, রাতিহানে দিনহান, অমাবস্যার দিনে পূর্ণ চন্দ্র নিকুলতই, পূর্ণিমার দিন হাকে জোনাকহান নাথাইতই। মানু জরম অইতে বুজন অইতাই মরতেগা কনাক অইতাই। রাজার থতাৎত নিকুলিল যাথাংহান মাটিং পড়িয়া ঔনা নেই।

বামনগই মাতল — ‘পদবীহান নেয়য়া জিংতা অয়াতে কিতা করতু’ —
বুলিয়া বামন এগ ডমকো মাটিহানাং পড়িল ঔগদে মরে পড়িলগা।

বেতালে আংকরল, — মহারাজ বিক্রমাদিত্য, বামনগ মরিল পাপ এহান কারাং লাগতইতা।

বিক্রমাদিত্যই মাতল — রাজা, রাজকর্মচারী বার সভাপতিরাং পাপ লাগিয়া ঔনা নেই। দেশ ঔহানাং কিতাপারা আগ সভাপতিগ নায়া থা থাইলেতে ঔগই ব্রহ্মহত্যা পাপ এহান বহন করতই।

চিন্তামণির চিন্তা

চিন্তামণি খালকরতে খালকরতে মরানি বিংতা অইল। ঔতাপেয়াও তার খালকরানি লই নার। আর না খালকরতৌ বুলিয়া কতিয়ো চেষ্টা করত, সুপ কানা নেই। তা কুনো হবানেই চিন্তা করেরতা নাগই। মানুরে ঠকানি, মানুর সাক্তিহান করানি, মানুর সম্পত্তি ডাবানির চিন্তা নাগই। তার প্রধান উদ্দেশ্যহান কিসাদে করলে সমাজর মঙ্গল অইতইতা! কিসাদে করলে সমাজ এহান এক অয়া মুঙেদে কাকেই কারতইতা। কিসাদে পথগই চুমছেতা! চুম পথ ঔগ কুরাং থাইলতা! ঔগ কিসাদেগ! এতা এতা খালকরিয়া চিন্তামণি নিয়াম হিনপার।

এবাকাউ কুনো দল আহানাং না হমাছে থাংতে আকতায়ো তারে দেহে নুয়ারতারা। পথেদে আটলে চেয়া আহিতারা, ঘরে থাইলে আপপানে লৌদিয়া-যিতারাগা।

রাতি ঘুম নাহের, দিনে কাম করানি নাহের। মুরগং মধ্যম নারাইন গছিয়া চার আকডেকি, ঘৃতকুমারীর পাতাল বরন দিয়া চার আকডেকি কিংতাযো কানা নার। মানুর কথা হুনিয়া কতদিন মিরামিষ খেয়া চেইল, কতদিন রউবাউ খেয়া চেইল, প্রাণায়াম করিয়া চেইল, যোগাসন করিয়া চেইল, জলচিকিৎসা করিয়া চেইল, কতদিন না হিনেয়া চেইল, বায়োকেমিক, কবিরাজি, ম্যাগনেটিক বেল্ট কততা করল থাঙো আকতায়ো কানা নাইল। তার চিন্তাহান দুরেই অনার লক্ষণ নেই। ডাক্তারর কথা লয়া ভাইটামিন খেইল, গাঙর মেইপা আগর কথাল বনালি করল-উহ! কিংতাযো কানা নার। তার চিন্তা ঔতা দুরেই অনাতে থাক-হপনেদে পেয়া দেহানি অকরল। মুরগ এক্স-রে করিয়া কিংতাউ নাপেইলা। সোনোগ্রাফি করিয়া নুয়ারাহান ধরে নুয়ারলা। বিজেপিং আটিয়া চেইল কতদিন, কতদিন বার কংগ্রেস করিয়া চেইতেও তার চিন্তা এতা দুরেই নার।

চিন্তামণিয়ে খালকরের প্রশ্ন এতা জটিল বুলতৌ জটিল, সরল বুলতৌ সরল। যেসাদে—আমার ভাষা এহান মাগধীংত আহেছে বুললে আমি জাতহান হাবি ডাঙর অইতাঙাইতা, না শৌরসেনীংত আহেছে বুললে! ছ-এগ দিলে আমার সাহিত্যর উন্নতি অইতইতা, না, স—এগ দিলে।

দৌ হমাদিতে প্রশ্ন এতা নিংশিং অর। প্রভুর মূর্তিগতে নাউ আহের-স
বার ছ এগহে যুগল রূপহান ধরের। আটতে বইতে, খেইতে ঘুমজিতে, হপনে
টেইপাঙে, আলি কারতে, বালা আটতে ইমে এতাল খাল করের, এতাল চিন্তা
করের।

আকদিন আকখুলাগই বয়া আমার ভাষা এহান মাগধীৎত আহেছেহান
সাং বুলিয়া খালকরের ঔপেই ঠিক ঠিক গই ঠিক ঠিক বুলল। আরাক আকদিন
বার আমার ভাষা এহান শৌরসেনীৎত আহেছেহান সাং বুলিয়া খালকরতৌ ঠিক
ঠিকগই ঠিক ঠিক বুলল। এহানতে বার কিহান। ঠিক ঠিকগই পেয়া হাই ঔহান
ধরে নুয়ারিয়া দ্বি় বারাদে অরতা কiyাকা।

কুল কিনারা নাপেয়া চিন্তামণি ঠিক চাকুরা আগরাং গেলগা। ঔগরাং
দক্ষিণা দিয়া প্রশ্নহান করল আরো ঔগই মাৎল—তি ঠাংচায় থাচিয়ে তিলছে দিন
আহানাং প্রশ্নর উত্তর হারপানিরকা আহেছে। ফলহান-সংশয়। রাছ শনি বার মঙ্গল
বক্রী, বৃহস্পতি নীচস্থ। শনি রবি সমসপ্তমে। বাপকে পুতকে দেহাদেহি অছি।
তোর প্রশ্নর উত্তর চুমকরে বিসারেয়া নাপেইতেই। তি কাম আহান কর। কবচ
আগ দিৎ, মাঙসেঙ বাছিয়া সাকলসেলে মিরামিষ খেয়া গণক আগরে সিদ্ধা আহান
দিয়া এগ ধারণ করিছ। মুরগ চিকইতই, সংশয় দুরেই অইতই, তি হাবি প্রশ্নর উত্তর
পেইতেই। জ্যোতিষার্ণবে মাতেছি—চিন্তা শিরোপীড়াশৈব। কবচ এগ পিদলে মুরর
ব্যাদি বালা অর। এবাকা রূপা যাংখেই আহান দিয়া যাগা। মি ঠাংচার দিনে শোধন
করিয়া থ দিতৌ। তি যুমসাকেইসার দিনে পাচসিকি দক্ষিণা দিয়া এগ নিছগা।

কবচ এগ হইগ অইতই। এগর তেজহান নিয়াম জবর অছে। পিদল দিন
ঔহান নুয়া প্রশ্ন আহান মুরগৎ আহিল। ঔহান অইলতাই ঘরে আমার ঠারহান
নাটটরেয়া আরাক ঠার আহান টটরানি হানরে অইলেতে বাংলা না অসমিয়া কুংহান
টটরানিয়ে হবা অইবতা। কতদিন থায়া আরাক প্রশ্ন আহান মুরগৎ আহিল। ঔহান
অইলতাই কুনতাই নিকালাছি লেরিকহান চলেইলে হবা অইতইতা। আগেকার প্রশ্ন
ঔতার উত্তরতে দেনা নেই কবচ এগই নুয়া নুয়া প্রশ্নহে নিকালানি অকরল।
চিন্তামণিয়ে এতা কিতাল পত্রিকাং চিঠি আহান দিল ঔহান আগই ফাইলগৎত জব্দ
করে বেলল।

প্রশ্নর উত্তর নাপাছে পেয়া চিন্তামণিরতা মনহানাং শান্তিহান নেই, গারিগ
হরতানি নেই, খেইতে ছয়াৎহান নেই, ঘুমজিতে ঘুমহান নেই, লেরিক ছনতে

মনহান নেই। নেই নেই এহানলতে কইদিন চলত!

আকদিন শৌর মালক ঔগরে ডাহিয়া মাংল — যাউরিগা নাইয়ে হ্লামতির মালক। সমস্যা এতার সমাধানতে এ জনমে করে নুয়ারলু নাই। ইমে প্রশ্ন এতার উত্তর নাপেয়া মরানিৎ পড়লুতাক। কুংগ লাল, কুংগ চুম কিগই জানে, মি মরলে হাবিরৌ বার্তন দিয়ো। প্রশ্ন এতা ইকরিয়া থছু করপেথ ঔতা গাটেদে বাছ্যা দিছ। ঔতা বুলিয়া আহির পানি বেলল। বেলল ঔগদে আহিগ জিপেইল। আহিগ জিপেইল ঔগদে মিছল নেয়ইল। মিছল নেয়ইল ঔগদে ঠইগ লালইল। হ্লামতির মালক চিকারি দিয়া কাদল। কোন দলরতাউ সেবাৎ নাইলা। তানুর দলরগ নাগই থাংতে সেবাৎ আহানি ঔহান দল বিরোধী কামহান বুলিয়া রায় দিলা। ইমে কুটুম কাসা আগদুগই নুয়ারতেগা সেবা করলাগা। পিছেকার য়ারিহান আগে দেনাহান পারা শ্রাদ্ধহানৌ ইমে চিরিক চারিক অয়া গেলগা।

তার ঠই এগল আরাক কৌলি আহান অইল। যমদূতে মাংলাতাই, এগ সমাজর নাঙে চান্দা করিয়া জিপুতর বিয়া নাদেছে, দলর আদেশ পেয়া মানুর কর্ম বাগানিরকা গইগ অয়া না আটেছে। এগর গারিগৎ পাপর জরা আগ নেই, চিত্রগুপ্তর খাতাৎ রাঙা কালির দাগ আহান না পড়েছে, এগরে লাছলে যমপুরীৎ নেনা নুয়ারতাঙাই। বিষ্ণুদূতে নেইগা। বিষ্ণুদূতে খুমকরলা কত ঠেকে পড়েছিগা! জনমে দিন আহান হবাই দৌ না হমাদেছে, গাপ থিলকরিয়া নামসা না পিদেছে, কার্তিকর পালিৎ গিয়া না কাদেছে, মানুর মুঙে মালা না আটাছে, এগরেতে কিতা বুলিয়া আমি নিতাংগা। সমস্যা এহানর সমাধান নায়া কৌলিহান পারা করে অইল ঔবাকা দ্বিয়তায়ো মাতলা — এসাদে নাইতই। ব্রহ্মা গিরকে সৃজন করেছেগ তা কিহান করের ঔহান করক।

চিন্তামণিয়ে ব্রহ্মা গিরকরে দেহিয়া হমা দিল। ব্রহ্মার রূপহান ক্যালেগুর , সিনেমা বার টিভিৎ আগেৎতৌ দেহেছেগ থাংতে দেহিয়াও ব্রহ্মা বুলিয়া চিনে পারলতা। ইমে খানি বুড়া অছে ঔহান।

চিন্তামণিয়ে ব্রহ্মারাং তার সমস্যা ঔতাল য়ারিহান অকরতে ব্রহ্মা গিরকে মাতল — মিতে এবাকা বুড়া অয়া লালতু বেলতু অছুগ, সমস্যার কথা হবাই খালকরে নুয়াররি। ঔতার গজে কানহানৌ খানি বদালা অছে। অশ্বিনীকুমার দ্বিয়গিরে আকখুরুম চেয়া যেইগা বুলতে সুপ সাঙ নাইতারা। শিরাপ কিতা নাদুরি থাংতে ঔতা মোরে গণ্যতা নাকরতারাতা! তি ইয় কর, কাম আহান কর। বিষ্ণুরাং

আংকরগা।

চিন্তামণিয়ে মাতল-মিতে নুয়া মানুগ, পথঘাটো নাচিনু। যিলগা জুগৎ আহান করে দিক বেনাই। বিষ্ণুবাং আগে যানাই হবা অছিলতা। চালাক করে উত্তরহানি পেইলুইছ।

ব্রহ্মাই মাতল - আগে পিছে বুলিয়া কিংতাউ নেই এপেই। বার, আকপেইংত আকপেই যানার প্রশ্নউ না উঠের। স্থান কাল পাত্র এতা হাবি রিলেটিভ এনা। তি আইনস্টাইনর মূল থিয়োরি ঔহান না পাকরে থাইলৌ রাসেলর এ. বি. সি. অব. রিলেটিভিটি ঔহানতে পাকরেছৎ নাই।

চিন্তামণিয়ে মাতল - ‘হে পিতামহ ব্রহ্মা গিরক! আমিতে বিষ্ণুপ্রিয়া মণিপুরী। খাটি আৰ্য সন্তান। আমি মানুষে ইকরেছি লেরিক না পাকরিয়ার। মানুরতাল কিতা করতাং! আমি নিজে ইকরিয়ার ঔতাল আমি়ে আমি়ে ডাঙর অয়ার।’

মিকুপে বিষ্ণুলোকহান অইল। প্রভুয়ে বংশীধারী পীতাম্বর মদন মনোহর কৃষ্ণরূপ ঔহানল চিন্তামণিরে দরশন দিল। চিন্তামণিয়ে মাংল - ‘প্রভু! ব্রহ্মাই মাংলতাই বিষ্ণুলোক - অইলতাই গোলোকধামহান। এহান কিসাদে অইলতা?’

প্রভুয়ে মাতল - এতা কথা হার নাপেইতেই।

চিন্তামণিয়ে মাতল - হারপেইলু হারপেইলু প্রভু। আমার মানুষে মালঠেপে লাংকরতারাতাই রাধা কৃষ্ণ বার চিঠিৎ ইকরতারাতাই জয় বিষ্ণু। এহান নাগইতা য়ারিহান। হাইদে প্রভু, বাজে কথাল সময় নষ্ট নাকরিয়া প্রভুবাং মোর সমস্যা খানি নিবেদন করিৎ। মি মর্ত্যভূমিৎ থাইতে -

- তিতে মর্ত্যভূমি এরা দিয়া সংসারর হিংসা নিন্দা, দলাদলি, মুই বড় হাবিতা ত্যাগ করিয়া দিব্যদেহগ পাছৎগ। মনহানৌ দিব্যহান কর এনে। মর্ত্যর সমস্যা, চিন্তা, হিন দুখ, জ্বালাযন্ত্রণা, কৌলিখান্না হাবি পাছরিয়া শাত হবা অঙ্গরার নাছা আছে, স্কটল্যাণ্ডেৎত’ আহেছে অতি মধুর পুরানা সোমরস আছে, এলা আছে ঔতাল মত্ত অয়া থাক এনে। হাবি সংশয় ত্যাগ কর। গীতাহানাং আছে নাই অর্জুনে আংকরেছিল হাবি প্রশ্নর উত্তর।’

- বাসা প্রভু! অপরাধি গাককরেদিছ। গীতাহান বুলর ঔহানতে মাগানা বিলেইতারাহান, না ঔহান পইসা দিয়া লনা?

- এতাতে মাগানা কথা নাগই নাই মাগানা বিলানিতে! সামান্য খানি মানি আহান

দাম দিয়াতে লইতে নাই। অং বার তাং দ্বিত্যতাউ আছে।

— প্রভু, ঔহান অইলেতে নাইল নাই। আমি বিষ্ণুপ্রিয়া মণিপুরী, হাবিত সিং মানু। সংসার এহানাং আমারাংত জিঙে সিংতা নেই। আমি খাটি আৰ্যবংশ। আমি পয়সা দিয়া লেরিক নালয়ার। ঔতা যেতাউ অক প্রভু, মর্ত্যর চিন্তাতে বেলা বুললেই বেলা পারুরি থাং। জরম অছিলু জাতহানর চিন্তা কুরাং বেলতুগা।

— তিতে কিসাদে জাতহানাং জরম অছিলেগ!

— মাংলু ঔহান নাই। মি খাটি আৰ্যবংশর সন্তানগ। ক্ষত্রিয়গ। বিষ্ণুপ্রিয়া মণিপুরীগ।

— ঔতাতে বার কিতা থাং?

— প্রভুতে সৰ্বজ্ঞগ। কাছাড়, ত্রিপুরা, জিরি, হিংলা, প্রতাপগড় বার ভানুগাছে বিষ্ণুপ্রিয়া মণিপুরী বুলিয়া জাত আহান আছি। তানু প্রভুর মারুপ অর্জুনর পুতক বজ্রবাহনর বংশ। প্রভুয়ে হিনপেয়া ভারতহান পাকরলে হারপেইতেই। ঔতার গজে আমার মানুয়ে ইতিহাস বুলিয়া আকতা ইকরেছি ঔতা পাকরলৌ হারপেইতেই। ঔতাং হাবিতা ইকরিয়া আছে। এরে বিষ্ণুপ্রিয়া মণিপুরী বুলতারা এতার গারিৎ প্রকৃত ক্ষত্রিয় রকত এবাকাউ আছে। এবাকা পেয়া লালফামর অভ্যাস বেলা নুয়ারিয়া তানুয়ে তানুয়ে দলাদলি করতারা। দল আহান আছি ঔতাতে মানুর কর্ম বাগানিং নিয়াম হেইনা। কিংতাউ নাজানিয়াও হাবির গজে অনা মনেইতারা। আগরে আগই যাকরানি নেই, মকদমা করতারা তানুয়ে তানুয়ে। আরাক জাত আহানে নিন্দা করলে পদফামল আছি ঔতা গাতেদে লুকেইতারাগা। এসাদে করে তানু ক্ষত্রিয়র অভ্যাসহান থছি। যেকনাপাই হারৌ অয়া...

প্রভুয়ে লমকরানি নাদিয়া মাংল — এসাদে জাত আহানে পৃথিবীহান ভরি করিয়া থায়াতে কিতা করতা। মি খণ্ড প্রলয় আহান আনিয়া এতারে ধ্বংস করে দিং বেনাই। হাবি সমস্যার সমাধান অইবতা।

— প্রভু আপপানে হিন নাপাদিক। তানুয়ে তানুয়ে লাগিয়া ইমে আপপানে নির্মূল অইতাইতানা। খানি গজেদে কাছি ঔতাই নিজরে বিষ্ণুপ্রিয়া মণিপুরী বুলিয়া পরিচয় দেনা লাজপেইতারা। পররতা হিকানিং নিয়াম হেইনা। নুয়াতা হাদা মস্থই বুলতারা ঔসাদে পররতা হাদা বিষ্ণুপ্রিয়া। আকতাই বাঙালি অলইতারাগা, আকতাই অসমিয়া অলইতারাগা, আকতাই বার হিন্দুস্থানী অলইতারাগা। এসাদে করতে করতে আকদিন আপপানৌ লুপ্ত অয়া যিতাইগাতা না। প্রভু! মি মাতিং বুললেতে জাত এহানাং আকখুরুম অবতার অদেগা। দুষ্টর দমন শিষ্টর পালন করিয়া

গীতাহান বুলর ঔহান নুয়া করে মাতিয়া হাই পথ ঔগ হবা করে দেহা দিয়া আইগা। সমাজহান হাবি, প্রভুয়ে দেহাদিতেই চুম পথ ঔগ ইলইবাতা।

প্রভুয়ে মাতল — তোমার দলাদলি এতাং আকতারাং জরম অইলেগা আরাক আকতাই ভগবানগ বুলিয়া নাউ য়াকরে দিতাই। লয়ইতেগা ঠকগ বুলিয়া হাইকোটে কেইস করে দিলেতে? ঔতা য়ারি বেলা, মাত, মর্ত্যভূমিৎ থাইতে কিতাল সমস্যা অছিলেতা?

— হাই প্রশ্নখানি মনহানাং উদয় অছিলতা। ঔহানির সমাধান প্রভুয়ে মাতে দিলেতে —

— কি প্রশ্নহানি থাং মাত চেইক।

— প্রভু, মোর পইলাকার প্রশ্নহান দস্ত্য-স এগ দিলে আমার সাহিত্যর উন্নতি অইতইতা, না ছ-এগ দিলে? কিগ ব্যবহার করলে আমি নাঙ করতাঙইতা?

ভগবান এগ ইমপানি অয়া কতহান খালকরিয়া মাতল — হাইদে পিছেকার প্রশ্নহানাং পড়গা চেইক।

— হাই প্রভু, আমার ভাষা এহান শৌরসেনীৎত আহেছে বুললে আমি জাত ডাঙর অইতাঙইতা, না মাগধীৎত আহেছে বুললে?

ভগবান এগ কতহান না খুমকরিয়া থাইল। চিন্তামণিয়ে মাংল — প্রভু ঘুমজিলেতানা কিতা? প্রভু স্বরগ? মোর তৃতীয় প্রশ্নহান — কিসাদে দলহানাং হমেইলে সমাজর মঙ্গল অইতইতা?

প্রভুয়ে মাংল — ইতাউ অর্জুনর প্রশ্ন ঔতাই সহজ অছিল। তোর এতাতে অতিরিক্ত জটিল অছে। হুনিয়া মুরগ বুলার। খানি আগে মহাদেব আহেছিলতা। এপেই আয়াও তার গাঞ্জাকারি ঔহানতে না বেলার। ঔতার ধুমা ঔতা নাকেদে থতাদে হমেয়া কিতা কিতি করে মুরগ। ঔতার গজে তোর প্রশ্ন এতা হুনিয়াতে মুরগ বুলানিহান আরাকো জবর অইল। না, প্রেসারহান হাই অইলতা? এবাকা ঘুমশৌ আহান দিয়া চেইং।

সুদর্শনচক্র

এতা পারা বৈজ্ঞানিক ঘটনা এহান আবিষ্কার করলতাই আমার ধলামুনি খুড়াই, আমার আজন্মের সালেদে আরাক আকতাই নাঙ পেয়া এরলা।

ধলামুনি খুড়া কার্তিকের পালির লেরিক দিয়া ঘরে আহেরতা। ঔদিন কালানির বুজন আগয়ো লেরিক দিল। হবা অছিলতাই ধলামুনি খুড়ারতা, বার প্রেমে হমেইতে হমেইলাতাই কালানির বুজন ঔগরাং। ধলামুনি খুড়াই লেরিক দিতে গুজুরা গুজুরি করলা। হ্নেকুরা ভাবকৌ নাছিতা না! আগেকার বুজন ঔতা নেয়ইলা। এবাকার এতাতে ঠংকা বার খট্টাঙ্গ ঔতাই মনেইতারা। এতা কিতা খালকরে খালকরে দুঃখহানে ঘরে আহের। মাঞ্জিগাছির হেইনৌ জারির তলে আহিল ঔপেই কওয়া আগই খাংতা রহিল। গজেদে চেইতে দেহেরতা হাকহানাং গুলডুরাগৌ পারা, কিগৌ পারা আগ ঝরক ঝরক করের। ধলামুনি খুড়াই মাঞ্জিরে ডাকদিল, মাঞ্জিয়ে কাদাবারারতারে ডাক দিল। এগদে ডাহাডাহি লৌদালৌদি অইতে হ্নতারা হৌগদে মিয়াঙর গাঙ ঔহানাংতৌ চিকারি দিতারা। চেইতে চেইতে ডাঙর গই আগ অইল।

তানজাহান চেয়া আকতাই ডাক, ঢুল, ঝাল, করতাল মাংকাং বারানি অকরলা। মালঠেপে দৌর মুঙে বামনগই ঘন্টি বাজানি অকরল। আকতাই মাংতারা এগ সরারেলর বজ্রগ। আকতাই মাংতারা এগ আমেরিকাই এরা দেছি এটম বমগ। আকতাই মাংতারা এগ মহাপ্রলয়র জ্বিগ। এসাদে গুজুরাগুজুরি, লৌদালৌদি, ডাহাডাহি এতার হাদিৎ আগর কথা আগই নাউ হ্নতারা। মালক লকেয়ে শৌ খকরিয়া কাদতারা, বুজনে মালঠেপে পুলয়া দৌর মুঙে কাদতারা।

পিছেকার দিন পত্রিকা বার রেডিওং মাতলাতা মঙ্গল বার বৃহস্পতির হাদিগৎ আছে গ্রহাণুপুঞ্জ ঔতার আগ পৃথিবীর বারাদে আহেরতা। ঔগ আয়া গজে পড়তই দিন ঔহান পৃথিবীহান হাবি ধ্বংস অইতই। আমেরিকার রেডিওং মাতলাতা এগ পড়তই দেশ ঔহানহে ধ্বংস অইতইতা। আরতাতে জিংতা অয়া থাইতাই। সমুদ্রহানাং পড়লে সমুদ্রর পানি কায়া নেম দেশ ঔতা বুরতই। আমার ধলামুনি খুড়া যেগই এগ আবিষ্কার করল ঔগর নাঙ শাং সুপকরে নেই আকপেয়ো।

মানুহান উঙয়া দেশ বেলেয়া দাপদানি অকরলা। খানি নেম, পানিয়ে বুরার দেশে আছি ঔতা টেঙারাদে কইলগা। ঔবাকা প্রচার অইলতা হিমালয় পর্বতর হাবির গজর চূড়া ঔগৎ বয়া আহৌ বছর ধ্যান করেছে সাধু আগই মাতেছেতা এগ তা যজ্ঞ আহান করিয়া খেদে দিয়া পারতই। যজ্ঞ ঔহান করানিরকা যজ্ঞবেদী আগই আশ্রম আহানে হংকরে দেনা লাগতই। যজ্ঞবেদী ঔগ হংকরানিরকা আকতা চান্দা করাৎ নিকুলেছি। নেপালর সন্ন্যাসী আগই মাতেছেতা মহাপ্রলয় এহানাৎত জিংতা অনি মনেইলে পারিল মাটিকর দান কর। থয়াতে কানাহানতে কিহান! আকতাউ নাথাইতই।

গাঙে গাঙে অষ্টপ্রহর, চব্বিশ প্রহর, আটচল্লিশ প্রহর হরিনামর চান্দা অকরলা। সাধু মহারাজ, কালীসাধক, বোম ভোলানাথ, বৈরাগী বার আরতাউ নানানতাই দৌয়রাং ভোগ কাৎকরানিরকা ভিক্ষা করানিৎ নিকুলেছি। ধান চৌল, রুপা পইসা যেগই যেতা পারলা ঔতা ডালিয়া দিলা তানুরে।

পত্রিকাৎ নিককা ডরপেইল মানচাকর পৌ নিকুলের। লগুনর মানমন্দিরেৎত মাতেছিতা এগ এশিয়ার গজে পড়তই। আমেরিকার বৈজ্ঞানিকে মাতেছিতা এগ উত্তর কোরিয়া নাইলে ইরানর গজে পড়তই। চরেদে এটম বোমা হংকরানির ফলতে পেইতা নাই। পাকিস্তানরতাই মাতেছিতা এগ যেসাদৌ ভারতর গজে পড়তইগা। কাশ্মীর তানুরে দিলেতে জিংতা অইতাই। প্যালেস্টাইনর মানুষে মাতেছিতা এগ ইজরায়েলর গজে পড়তই যেসাদৌ। আকতাই মাৎতারাতাই বিষ্ণুপ্রিয়া এতা নিয়াম লামহেলো যিতারাগা। এগ ইমে এতার গজে পড়তইগ। এহান হুনিয়া আমার মানু আরাকৌ উঙইলা।

গণক আগই গাঙে গাঙে মাৎলগা – কিৎতাউ নাইতই। মোর আসল প্রহরত্ব ধারণ করতাই ঔতারতা মরণ নেই।

দক্ষিণ ভারতর মৌনী বাবা আগই ইঙ্গিতল মাতেছেতাই - যেসাদৌ মহাপ্রলয় অইতই হাইহান, কিন্তু ধর্মবিশ্বাসী, নিককা শতনাম পাকরতারা, ঠেকাৎ নাপড়লে মিছা না মাৎতারা, গারিৎ চরখাট, মানুঠকানি, ঘুষ খানা কম ঔতারতা ভয় নেই। হাবি পাপীতাপী মরিয়া ইমে হবা হবা মানু থাইতাই। নুয়া করে সত্যযুগহান আহিতই। সাধু সন্ন্যাসী বামনরে পইসা দিতে লিক নাইতাই, হাবিয়ে চাকুরি পেইতাই, লেইরাপাই পেট বুজে বাত খেইতাই, বৌবরন, গুলা, ভূমিকম্প নাথাইতই, পুলিশে মানুর লগে মুকসি দিয়া টটরতাই। পৃথিবীহান স্বর্গহান অইতই।

মানু এহান কারে বিশ্বাস করতা, কারে নাকরতা, কিতা করতা, কিতা নাকরতা ঔতাল হয় হয় অছি।

চুড়ামণি মামার নাতিয়কে মেলাত দূরবিন আহান লছিলতা। চুড়ামণি মামায় আকদিন ঔহানল হাকেদে চেয়া কাদে বেলল। কাদিয়া মাৎল—এতা হাবি মিনামপা কথা। এতা দৌ দুক নাকরতারা, হাইতাই নাগইতাই খেইতারা ঔতাই নিকালাছি কথা। এগ প্রভুর সুদর্শনচক্রগ এনা। স্নেচ্ছহ নিবহ নিধনে—পাপী তাপী স্নেচ্ছ ঔতারে মারানিকা এরা দেছেগ। সাধু সাবধান।

বামনগই পাঞ্জিহান চেয়া মাৎল—মিতে আগেতৌ হারপাছুগ এগ স্বয়ং প্রভুর সুদর্শনচক্রগ বুলিয়া। এগ প্রভুয়ে আমার মানুরকা এরা দেছেগ। এগ যেতাই পেইতাই ঔতা হাবির গজে অইতাই। তানুর দলহানে চাকুরি দিতাই। তানুর লেরিক পাঠশালা চলতই। তানুর বানান সমাজে চলতই। মাততে গেলেগা তানু রাজা পালইতাই।

এহান হুনিয়ৈ যুবকে সুদর্শনচক্র মহাসংগঠন বুলিয়া সংস্থা আহান হংকরাৎ বইলা। ঔপেই পদফাম নাপেইলা ঔতাই আরাক মহাসংস্থা আহান হংকরিয়া চান্দা করানি অকরলা।

এগদে দেশ ফুকয়া মানু এহান দূরবিন হানল সুদর্শনচক্রগ চানাৎ আইতার। দূরবিনহানরে পইসা দিয়া হমা দিতারা। চুড়ামণি মামাই দৌর লেইসাংগৎ দূরবিন ঔহান থয়া নিককা ফুল তুলসী কাৎকরের। নিজেও মানিয়া চলের। পয়লাকার কামড়হান মিরামিষল খার। গাঙর মানুষে পালিহান করে নিককা দূরবিনহানরে সিদ্দা দিতারা। আকতাই দূরবিনহানল চেয়া মাতলা-বুড়া এগই আপপানে ঠকারতা। কইতে আমিতে সুদর্শনচক্রগ নাউ দেহিয়ার। চুড়ামণি মামাই মাৎল—পাপী ঔতাইতে প্রভুর খুচুহান কিয়া দেখতাইতা! প্রভুর ভক্ত, পুণ্যবান ঔতাইহে দেখতা নাই। ঔবাকাৎ হাবিয়েউ সুদর্শনচক্রগর দর্শন পানা অকরলা দূরবিনহানল।

আমার মানুর পত্রিকা আহানাৎ নিকুলিলতা—আমি বৈষ্ণব, আমি চিত্রাঙ্গদার জিপুৎ বুলিয়া সংসারহানে হারপাছি। এরে সঙ্কটপূর্ণ সময় এহানাৎ আমি বয়া থাইলে না চলতই। এবাকা ছ—দন্ত্য—স বেলেয়া তালব্য শ এগল একতা অয়া শ্রীসুদর্শনচক্রগরে ঔককরিক। আমার সমাজে যেতা সাহিত্যিক আছি ঔতাই আরতাল না ইকরিয়া সুদর্শনচক্রগল ইকরানি থক। কারণ আমি হাবির গজর

জাতহান – আমি বিষ্ণুভক্ত বুলিয়াতে দাবী করিয়ার বার সুদর্শন চক্রগলতে কিংতাউ না ইকরিয়ার। আকতাই আমারমা বৈজ্ঞানিক নেই বুলতারা। আমি বজ্রর বংশ, আমারমা বৈজ্ঞানিক নেয়য়া ঔনাতা। চুড়ামণি মামার নাতিয়কে প্রমাণ করে দিল আমারমা বৈজ্ঞানিক আছি। সমাজে ঔতারে দাম নাদতারা। . . . এসাদে আরতাউ ডিগলগ করে ইকরেছি। লগে দূরবিন আহানর ছবি আহান দেছি। দূরবিনর ছবি ঔহানরে বান্ধেয়া পূজা করানি অকরলা মানুয়ে।

আকতাই নিখিল বিষ্ণুপ্রিয়া মণিপুরী মহাদূরবিন সাংস্কৃতিক সংস্থা আহান হঙ্করিয়া অনুষ্ঠান আহান করলা। ঔ অনুষ্ঠান ঔহানাং কিসাদে করলে আমার কলাকৃষ্টির উন্নতি অইতই ঔতাল ডিগলগ করে বজ্রতা দিয়া রাতিহান হাবি হিন্দিল এলা নাছা দিয়া গইগ অইলা। যেগই যেসাদে পারতারা ঔগদে দূরবিনহানল অছি। ঔহান দেহিয়া আকতাই মাতলা – তোমার এহান নাইল। তুমিতে মূল সুদর্শনচক্রগলতে নায়া, দূরবিনহানল গইগ অইলাই থাংতে। ঔতা বুলিয়া নিখিল বিষ্ণুপ্রিয়া মণিপুরী শ্রীসুদর্শনচক্র সমিতি বুলিয়া সংস্থা আহান গঠন করলা। সংস্থা ঔহানর সদস্য আগই মাতল – এসাদে সংস্থাতে হৌতাযো হংকরিয়া সমাজহান বিভ্রান্ত করতাই। ঔহানে আমার সংস্থা এগর পিঠিৎ ব্র্যাকেটে আদি বুলিয়া ইকরিক। খানি বাটটুকা সদস্য আগই চিকারি দিয়া মাংল – ‘মি এহানর তীব্র প্রতিবাদ করুরি। আমার ভাষা এহান বেদরৌ আগে সৃষ্টি অছেহান। স্বয়ং বিষ্ণুয়ে সৃষ্টি করেছে ভাষাহান। আমি হেতে মেতেতা নাগই। এহান হারপানিরকা ভাষাতত্ত্ব জানানি না লাগের। আমার বিরুদ্ধে চলতারা ভাষাতাত্ত্বিক মালয়া আকতা নিকুলেছি ঔতারে আমি মেইমুত করতাঙাইগ। ঔহানে সংস্থা এহানরে অনাদি বুলিয়া থইক।’ এতাৎত দরবার আহান দিলা। আদি ঔতাই হংকার দিয়া মাতলা যেপেই আমার কথা নাথার ঔপেই আমি নেই। আমি সংস্থাহান ত্যাগ করিয়ার। অনাদি দল ঔহানৌ দরবার করতারা। লয়ইতেগা দ্বিয়তারৌ সন্তুষ্ট করানিরকা ব্র্যাকেটে আদি অনাদি দ্বিয়হানৌ থনহান লেপইল। কতগই মাতলা – ইমে আপপানে হুমকি দিতারাতা না। আমার সংস্থাহানাং তানুরে পদফাম দেছি। বেলা দিয়া গেলেগাতে কুরাং গিয়া পদফাম পেইতাইগাতা।

আরাক গাঙ আহানাং মিটিং বয়া প্রস্তাব নিলাগাতা সুদর্শনচক্র এগ আমারগ। ধলামুণি খুড়া মূলে আমার গাঙেৎত অঙয়া গেছেগাগ। তা আবিষ্কার করেছে সুদর্শনচক্র এগর গজে আমার সম্পূর্ণ দাবী আছে।

আদি অনাদি দল ঔহানে লগে লগে মিনিষ্টারগর লগে উনা অয়া তানুর

দাবিহান জানেয়া থইলা। রাষ্ট্রপতিগরাঙৌ চিঠি দিলা। এম এল এং উবা অনা মনাছে আগই মাতল — এগ তুমি পানারকা মি অনশন করতৌ। চেইক কিসাদে নাপারাইতা। মি জিঙলে এগর মালিকানা যেসাদৌ তোমাং থাইতই।

আকতাই সুদর্শন চক্রগর নাঙে সংকীর্তন আহান লাংকরলা। ঔহান বাগানিরকা আদি অনাদির সেবাদাস বুলিয়া আগই ঘরে ঘরে গিয়া মিয়াং বাঙাল বুঝানি অকরলগা — তার দলরতাই নায়া অন্যতাই সংকীর্তন করানি এহান থক নেই। এসাদে করলে মানুষে আমাৰে ভুল বুঝতাই। চি যৌপা সময় এহানাং কিতার সংকীর্তন। মানুষে তার কথা যাকরিয়া সংকীর্তন ঔহানাং যানা নাকরলা।

এতার হাদিৎ মিশরর পত্রিকা আহানাং নিকুলিলতা ইজরায়েলর বৈজ্ঞানিকে এগ আরব দেশর গজে বেলানিরকা চেষ্টা করতারা। এতাল মহা পরলেই আহান। রাষ্ট্রপুঞ্জং ডিগল বিতর্ক আহান অইল। আরাক পৌ আহান পত্রিকাং নিকুলিল। ঔহান অইলতাই আসন্ন বিপদ এহানাং আর কৌলি থয়া লাভ নেই বুলিয়া আমেরিকা বার রাশিয়ার নেতা ঔতাই তিলয়া সুইজারল্যাণ্ডে বান্দারা আহান থেয়া হাবি কৌলি ত্যাগ করিয়া পৃথিবীং আছে থৌ এতা সমান সমান বাটানি বুলিয়া লেপকরেছি। ঔতাও শত্রুরে বিশ্বাস নেই থাংতে এটম বোমাতে নষ্ট নাকরতাই।

ঔদিন রাতি ভূমিকম্প আহান অইল। মানুহান উঙয়া পথে নিকুলিয়া কাদানি অকরলা। চুড়ামণি মামাই মাতল লাছলে না কাদিয়ো। তুমি দূরবিনগরে উপযুক্ত সম্মান দেনাহান হিনপারাই আরো ভূমিকম্পহানল সাবধান করে দেৱতা। কিহান করানি থক ঔহান খালকরিয়া চেই।

পত্রিকাং নিকুলিলতা — গ্রহাণপুঞ্জর যে টুমান পৃথিবীহানাদে আহের ঔগর তেজহানে ভূমিকম্প অইলতা। এহানে আমাৰে সাবধান করে দেৱতা। এখুরুম অইতই ঔহানেতে হাবিতা ছাৱখার করতইগ।

নিককা গরম গরম খবর নিকুলের। সাংবাদিকে সরকাররাং প্রশ্ন করলা — সরকারে কি ব্যবস্থা গ্রহণ করেছেতা? সরকার পক্ষত উত্তর দিলা — বিপদ এহানাংত উদ্ধার পানারকা আমি মন্ত্রীসভা বিস্তার করিয়ার।

দৌলিসিং বুলিয়া আমার মানুর পত্রিকা আহানাং ‘ভক্তিয়ে মুক্তি’ বুলিয়া সম্পাদকীয় আহান ইকরলা — “সমাজ নাকরতারা আকতাই আমাৰে ইমা চিত্রাঙ্গদার জিপুং নাগই বুলতারা। ঔহান অইলেতে কিতা আমি মালকগ নায়া জরম অইলাংতা? আমি এবাকা কিহান করতাং ঔহান এক অয়া লেপকরিক। মানুৱাং

মাততে লাজপেয়ার সুদর্শনচক্রগ কুংগই পানা থক ঔহানল এবাকাউ কৌলি লাগিয়া থাইলাং। আমার সাহিত্যিক যেতাই নিজরে নিজে ডাঙর বুলিয়া খালকরতারা ঔতাই জুম মারিয়া কিংগর সাদে জাবুর দিয়া থাইলা। সেক্সপিয়ারে ইলিয়ড বার অডিসি বুলিয়া নাটক দুহান ইকরেছিল। ঔহানিৎ সমাজহান কিসাদে চলানি থকর ঔহান সা সা করে মাতেদেছে। ঔ নাটক দ্বিয়হানিরকা তারে আমেরিকাৎ নোবেল প্রাইজ দেছিল। আমার সাহিত্যিকরমা ঔসাদে নোবেল প্রাইজ পাকুরাতে কই! কিহানল তানু বড়াই করতারা! সমাজর লগে না তিলয়া ঘরে বয়া সাহিত্যিক অইলেতে ইমে এহান দশাহান। সমাজহানর লগে তিলয়া সাহিত্য ইকরানি থকর। নিউটনে মাতেছে একতাই বল। ঔহান আমি কিয়া পাছরয়ারতা!

আরাক পত্রিকা আহানাং সুদর্শনচক্রগল মলাটর ছবিহান দিলা, লগে আদি অনাদির সভাপতি, কার্যকরী সভাপতি, কর্মকর্তা হাবির ছবি দিয়া সম্পাদকীয়ৎ ইকরলাতা — আমি কুনো দলরতা নাগই। সমাজরমা বিভেদ থানা এহান আমি সমর্থন নাকরিয়ার। আদি অনাদিয়ে আগেৎতৌ সুদর্শনচক্র এগ নিজর দখলে থছিগ। ঔহানল এগ তানুর সালেদে আহেরগ। শ্রীযুক্ত সুদর্শনচক্রগ আদি অনাদিয়ে পেইলেহে সমাজর মঙ্গল অইতই। ঔহানে আপপানে কৌলি না করিক। এতা কিতাল সুদর্শনচক্র সংখ্যা আহান নিকাললা। ঔপেই কবিতা আহান নিকুলেছিল ঔহান নিয়াম হবা অছিল।

হে সুদর্শন চক্রগ! তি কিসাদে মানুগ!

তোর বেসেপ টেংঠা এতা চেয়া আমি ঙাকছি।

কিয়া নামাতরতা তি আদি অনাদিরগ ঔহান

লিচেৎ থি মানুয়ে চিকারি দিতারা বুলিয়া ডরপার থাং?

পিছেকার সংখ্যাৎ আদি অনাদির আগই এহানর প্রশংসা করিয়া চিঠি আহান দিল।

মলাটর ছবি ঔহানল আকতাই প্রতিবাদ করিয়া ইউ.এন.ও, হিউমেন রাইটস বার অন্যান্য সংস্থাৎ দিয়া পেঠেইলা তানুর প্রস্তাব ঔতা।

আগই চিকারি দিয়া মাতল — তুমি য়েপেয়ো য়েইগা সুদর্শনচক্র এগ আমারগ। আমি তোমার সাদে ফলস চাকুরি নাদিয়ার। বার তুমি চাকুরির ব্যবস্থা করলে মি প্রতিবাদ করতৌ। চাকুরি দেনার অধিকার একমাত্র আদি অনাদিরতা। মি আজিরগাই চান্দা করিয়া চিফ মিনিস্টারগরাং যাউরিগা।

আগই গিয়া কেইস আহান করে দিলগা — ধর্মাবতার। এরে চেইক মি

ইকরেছু মণিপুরর ইতিহাসহান। চুড়ামণি মামা ঔগ মোর জরম হৌরকর দাপারগ। ধলামুনি মোর পিয়াতাক হৌরক। সুদর্শনচক্র এগ যেগ হেগর আতে পড়লে মহাপরলেই, সমাজে বিশৃঙ্খলার সৃষ্টি অইতই। ঔহানে এরে সুদর্শনচক্র এগ মি পানার পক্ষে বিহিতাদেশ অক।

আগই লৌদানি অকরল — দেখলাইতা, মাততেতে নাঙ্কলাই। মিতে — মাতলু নাই — আরতাই কেইসে যানার আগে আমি যিকগা বুলতে গারিৎ না লাগেইলাই। তানু আগে গেলাগানাই। এবাকাউ সময় আছে, মোরে রূপা দেই। কেইসহান চালেইংগা।

সমাজর মুখ্য মুখ্য জ্ঞানী গুণী শিক্ষিত গিরিগিথানিরেল সভা আহান ডাকলা সুদর্শনচক্র এগ কারগ এহান লেপকরানিরকা। “আমিতে ঔতা সমাজর মানু নাইলাংতা’ বুলিয়া দলে দলে মানু এহান আইলা; ঔতারমা যুবকে নিয়াম অছি। হাবিয়ৌ টটরানি মনেইতার। আকতাই টটরতে আরাক আকতাই — ‘আমার দলহান জিন্দাবাদ জিন্দাবাদ। সুদর্শন চক্র এগ আমারগ আমারগ। বিরোধী দলর আতে এগ নাদতাঙাই নাদতাঙাই’ বুলিয়া চিকারি দিতারা। হৌতাযো চিকারি দিতারা। ঔতাৎত কৌলি লাগিয়া মারামারি আহান দিয়া সভাহান পণ্ড করে দিলা।

আগই লিফলেট নিকালেয়া এগ দাবি করল। আকতাই ঔ লিফলেট ঔহান পুড়ে দিয়া মাতলা — এরে চি যৌপা সময় এহানাৎ ছ-গল লিফলেট নিকালেয়া সমাজহান বিভ্রান্ত করেৱতা। তাতে কিয়া পেইতইতা সুদর্শন চক্র এগ?

আকদিন পত্রিকাৎ নিকুলিল — মঙ্গলগ্রহগই এরে গ্রহাণু এগরে আকর্ষণ করাৎ লাগেছে। ঔহানে এগ দূরেই অ যারগা। পৃথিবীর বিপদহান কাপিল বুলানি যাকরের।

মানুয়ে মাতানি অকরলা - আমার কৌলি খান্না এতা দেহিয়া প্রভুয়ে সুদর্শন চক্রগ আলথক করে নেৱগাতা। হৌতাই দরবার নাকরলেতে এগ আমার সভাপতিগই পেয়া সমাজহানরে কতি গজেদে কাকরে দিলাইছতা!

বুজনে মাতলা - দৌ দুক নাকরতারা, বামন বৈষ্ণপ নাকরতারা, বুজনরে ঠানা নাকরতারা ঔতারেতে ভগবানে কিয়া তার খুচুহান দিতইতা!

যেতাই সুদর্শন চক্রগ পেইলে সমাজর উন্নতি করতাঙাই বুলিয়া চান্দা করলা ঔতারমা আগই পুতকর চাকুরি আহান ল দিল। আরাক আকতাই টাউনে গিয়া ঘর হংকরলাগা।

মকদমাহানতে এবাকাউ চলের।

দিগ্বিজয়ী পণ্ডিত

আগেকার দিনে ডাঙরিয়া পণ্ডিতে দিগ্বিজয় করাং নিকুললা। বিভিন্ন দেশে বুলে বুলে রাজপণ্ডিতরে তর্কং আহ্বান করলা। কুনো আগই তর্কং পরাজিত অইলে পণ্ডিত এগরে জয়পত্র আহান ইকরিয়া দিতারা। হাবি দেশর হাবি পণ্ডিতরে জিঙে পারব ঔগই দিগ্বিজয়ী পণ্ডিত উপাধি পেইল। দিগ্বিজয়ী পণ্ডিত আগ নবদ্বীপর কনাক পণ্ডিতশৌ আগরাং পরাজিত অছিল। যেগরাং পরাজিত অছিল ঔগর নাঙহান অইলতাই নিমাই পণ্ডিত।

এসাদে দিগ্বিজয়ী পণ্ডিত আগ মণিপুরহান হাবি জয় করিয়া দুর্যোধন মহারাজার সভাং গেলগা। দুর্যোধন মহারাজার সভাপণ্ডিতগর লগে তর্ক করানি মনার ঔহান বাগেইল। দুর্যোধন মহারাজাই এরে পণ্ডিত এগর লগে ফাগি আহান করানি মনেয়া আগরে দেহাদিয়া মাতল - ঔরে ঔগ মোর সভাপণ্ডিতগ। দিগ্বিজয়ী পণ্ডিত এগই চার থাংতে ঔগতে ভয়ঙ্কর বলী পাংকাল মানুগ। গারি ঔগ, আতজাঙ ঔতা বলিল বলিলগ আছে। এগই হিনচাপা আগরে ধরলেতে আকচিপাং লইকরে বেলতই। পণ্ডিতগতে নামালয়া মালগহে মালছে। মাল এগরে আরাক চারিগ মালে থৌ মর্দে দেনাং লাগেছি। এগর লগে তর্কতে থাক কাদাং চেপনিও মহাবিপদহান। এগই চাপড় আহান দিলেতে ছুগ করতই। মূলেতে ঔগ পণ্ডিতগ নাগই, মধ্যম পাণ্ডব ভীম।

দিগ্বিজয়ী পণ্ডিত এগই খানি দূরেইংত হমা দিয়া মাতল - তা পণ্ডিত!

ভীমে পণ্ডিত এগরে ঙাকয়া চেইল। চানা ঔহানাং পণ্ডিত এগ উঙো পড়িলগা। ঔতাউ মাতল - হাই মি দিগ্বিজয়ী পণ্ডিতগ। মণিপুর এহান জয় করিয়া দুর্যোধন মহারাজার রাজসভাং আহেছুতা তর্ক করিং বুলিয়া। হান্তে, দুর্যোধন মহারাজাই পণ্ডিত গিরিরে দেহা দিল থাংতে মি তর্ক করিং বুলিয়া আইলুতা। ভীমে দুর্যোধন মহারাজার ঔগদে চেইলো। দুর্যোধন মহারাজাই মুকসি মুকসি দিয়া ভীম বার পণ্ডিত এগর কুমেইহান চার। ভীমে হারপেইল, দুর্যোধন মহারাজাই পণ্ডিত এগরেল ফাগি করানি মনেয়া করেত। থাংতা পণ্ডিত এগরে ছঙ্কার আহান দিয়া মাতল - সমুদ্রকন্মা পুরানদো খাংবারা। পণ্ডিত এগ উঙয়া মুরগ বুলেয়া পড়িল।

হইমা! এরে বলীপাংকাল মাল এগ কতি ডাঙর পণ্ডিতগ অগেছেগাতা। মাতল লেরিক ঔহানর নাঙহান পেয়া নাছনেছে। খানি থায়া মাতল-না, পণ্ডিতগিরি... ঔগয়ো মোর লগে তর্ক করাং আহেছতা! যাগা ঘরে গিয়া হবা করে লেরিক লেইসৌ তামকরিয়া মোরাং আহিছ।

পণ্ডিত এগ লাজহানে উঙহানে ডরহানে মরণ ফাঙইল। দুর্যোধন মহারাজার সভাং এতাপারা ডাঙর পণ্ডিত আছিতা! তানু পাকরেছি লেরিক ঔতার নাঙ পেয়া হারনাপাছে। যেতাউ অক — এপেই নুয়ারল নুয়ারল! আরাক আকপেইতে গিয়া তর্ক করিয়াতে জিঙে পারতইগানাই। এগরাংত মাতল পুরাণ ঔহান হিকিয়া যানা হান লেপইল। মাতল-পণ্ডিত গিরি! পণ্ডিত গিরিরাংত ঔ পুরাণ ঔহান হিকানি মনাউরি।

— ঔহান অইলেতে মোরাং অজা নেইকর। মোরকা সিদ্দা আহান, ঔতাং চৌল যাংখেই মল, ঔহানর উপযুক্ত আচা আদাক বার বাঘমার্কা ফেইচম আহানল মোরে অজাগ করে বরিয়া।

— মিতে লেইরাপা পণ্ডিতগ। পণ্ডিত গিরিরতা অইবগা সিদ্দা আহানতে কুরাং পেইতৌতা?

— পইলা গেছিলেগা রাজা ঔগরাং মাতলেগা তা আপপানৌ হাবিতা জুগং করে দিতে। আইতে লগে বর্ণবোধ আহানৌ আনিছ।

— বর্ণবোধহানতে কিয়া?

— পইলাংত অকরবাংতা।

পণ্ডিত এগর দশা এহান দেহিয়া দুর্যোধন মহারাজা নিয়াম হারৌ অইল। ঔতার গজে তার রাজসভার সম্মানহানৌ ভীমে থদিল, এহানাং তারতা আনন্দর সীমা নেয়ইল। ডাঙর সিদ্দা আহানর জুগং করিয়া আককুড়িহান কামপংল সিদ্দা ঔহান দিয়া পেঠেইল। লগে রাধেকুরা বামন আহৌগ। সিদ্দা ঔহান ডাক ঢুল বারেয়া ভীমরাং নিয়া ফৌকরে দিলা।

ঔতা খেয়া পিয়া হদেয়া ভীমে মাতল-বর্ণবোধহান নিকাল। পণ্ডিত ঔগরে মাতল-এরে মেয়েক এগং আঙুলিগ দে-মাত-ক। পণ্ডিত ঔগই মাতল-ক। — যাগা আজিকার পড়াহান লয়ইল। কালি বার আহিছ। পিছেকার দিনে মাংল-ক বুল। পণ্ডিত ঔগই মাংল ক। যাগা আজিকার পড়াহান লয়ইল। কালি বার আহিছ।

পিছেকার দিনৌ ইমে ক বুলুয়েয়া পড়াহান লইকরল। এসাদে করে দিন এতা যারগা, মাহা যারগা, বছর যারগা। পণ্ডিত এগই এবাকাতে হবা করে হারপেইল - তার অজা ঔগ আসলে লেরিক না তামকরেছেগ। পুরাণহান বুলল ঔহানৌ সুন্দরহান। দুর্যোধন মহারাজাই ফাগি করিয়া তারে এরে ডাঙর বিপদ এহানাৎ বেলা দিলতা। নিক্কা ক - বুলে বুলে থাইল থাংতে তা তামকরেছিল বিদ্যা ঔতাউ মাঙইল। দাপদিয়া গেলেগাউ দুর্যোধন মহারাজার আতেৎত, ভীমর আতেৎত কুরাং গিয়া জিংতা অইতইগাতা। কি বিপদহানাৎ পড়িলতা! এবাকাতে কিসাদে উদ্ধার পানা? না ইমে এসাদে অয়া মরানি। খালকরিয়া কুল নাপার। খালকরতে খালকরতে বার বছর গেলগা। আর জিংতা অয়া থায়াতে কিতা করত। বিদ্যাহান নেয়য়াতে ইমেউ মরাগ। যেতা অইলতা অইল - মরলে মরলু বুলিয়া বামন এগ কালাচিংখেইর পরে দাপদিয়া গেলগা। দাপদের এগ, দাপদের এগ। খানা নেই পিনা নেই, জিরানি নেই, বহানি নেই ইমে দাপদের। এসাদে দাপদিতে দাপদিতে টেঙারা আগর তুয়ারগ পেইলগা। ঔপেই বয়া কাদানি অকরল। কাদে কাদে মাতেরতা - ভগবান দেনে উদ্ধার করেদে, দীনবন্ধু, তি জিংতা নাকরলেতে আর কুংগই মোরে চেইতইতা।

তাজ্জা ঔগৎ দ্বারকাৎ সত্যভামাই কৃষ্ণরে বাত হাজাদিরিতা। ভগবান শ্রীকৃষ্ণ এগ বাতে বয়া আচমন করিং বুলতে বামন এগর ডাকহান কানহানাৎ ফৌয়ইল। ভগবানে মুকসি দিয়া সত্যভামারে মাতল - বাসা মোরতা বাতখানাহান নাইল। এবাকা মি নাগেলেগাতে কুমেইহান সম্পূর্ণ নাইতই।

ঔতা বুলিয়া বুড়া বামন আগর রূপহান ধরিয়া এরে পণ্ডিত বামন এগর মুঙহানাৎ আহিল। আয়া আংকরল - হা! এপেই বয়াতে কিয়া কাদরতা? কিতা অছে থাঙ?

বামন এগই কাদে কাদে য়ারিহান হাবি ভগবানরাং দিয়া মাতল - বার বছর এহান ইমে ক এগল ছানেরতা। মোর বিদ্যাহান হাবি মাঙইল। মি মুখংগ অইলু। এসাদে থায়াতে কিতা করতু বুলিয়া দাপদিয়া দুরেই দেশ আহানাৎ গিয়া লুকেইংগা করে। ভগবানে মাংল - কুরাংতে লুকেইতেইগা? দুর্যোধন মহারাজা ঔগ সসাগরা পৃথিবী এহানর রাজাগ। ভীম বুলর ঔগউ বলীরমা খম থেঙছেগ। আকপেয়ো লুকেয়া জিংতা নাইতেইগা।

— হান্তে মোর উপায় হানতে!

- হাই, তানুরাংত যাথাং লয়া ছুটিয়া আইগা।
- হইমা ঔপেই বার গেলেগাতে মোরে ছুগ করতই ভীমে।
- কিংতাউ নেই হাট! মি গিয়া ছুটেয়া আনেদিংগা।
- না, না। মিতে মরতৌ, লগে তোরেউ মারতাই।
- কিংতাউ নাকরতাই। ভীম বুলর ঔগর বেইবুনি ঔহানে মোরে নিয়াম

য়াকরতারাগ। মি মাতলে তোরে কিংতাউ নাকরতাই।’ বামন এগ যানা নাকরের, ছদ্মবেশী ভগবানে তারে যানারকা জোর করে। তিতে দাপদিয়াউ লুকা নুয়ারতেইগা। যেপেই থাইলৌ ধরিয়া আনতাই। ঔতাংততে গিয়া তানুরাংত ছুটিয়া আহানি ঔহানে হবা অইতই।’ ভগবানে বামন ঔগরে এসাদে বুঝেয়া করিয়াতে আনল। দুরেইংত দেহিয়াও ভীমে চিনল এগতে ভগবান শ্রীকৃষ্ণ। হারনাপেইল সটান দিয়া চিকারি দেনা অকরল - কুরাং গেলগাতা পড়ুয়া ঔগতে। বিয়ানকার পড়াহান নাদিয়া মাঙছেগাতা। আজিতে পেইং করে।

চিকারিগ স্থলতাই বামনগরতা চৈতন্যগ উড়িয়া গেলগা। দাপদিং বুলতে ভগবানে আতহানাং ধরিয়া খামকরিয়া ভীমরে মাতল - তা যাইমা এহান কিহান। কিয়া বামন এগরে বার বছর এহান ক-এগল ছানরতা।

— বামন এগ পণ্ডিতগ মালয়া অহঙ্কার করেবতা। তার অহঙ্কার এহানরকা এরে দশা এহান অইলতা। গারিগং ভক্তিহান নেই, ইমে অহঙ্কারল বুজেছে দেহ ঔগত ভক্তিহান আনে দেনা মনেয়া অছুতা। বার বছর এহান ক-এগল ছানৌরিতা। কইতে ক বুলতে কৃষ্ণ নিংসিং নার ঔগতে কি পণ্ডিতগ।

এহান স্থনিয়া বুক্তা পড়িয়া পণ্ডিত ঔগ কৃষ্ণ কৃষ্ণ বুলিয়া কাদানি অকরল। ভগবান শ্রীকৃষ্ণউ তার ছদ্মবেশ ঔহান এরা দিয়া তার গোপীমনোহর রূপ ঔহান ধরল। বামনগ প্রভুর খয়াহানাং পড়িয়া কৃষ্ণনাম সলকরে সলকরে বৃন্দাবনে সালইল।

শোক সভা

তথাকথিত সাহিত্যিক বার কবি গজানন্দ মরিল। মরিল মরিলনাই।
কিমেতে করতাং সংসার এহানাং নামরেকুরা আকগৌ নেই। হাবিয়ো আকদিন
মরতাঙাই। ঔতা বুলিয়া মানুহান বাজারেদে য়ারিদেনাং সালইলা।

গাঙহানাং আগেকার রাতি ষষ্ঠী আহান অছিলতা। ষষ্ঠী ঔহানাং মাইক
আগ রহেইলা। আলথক করে নিতারাগা মাইক ঔগ গাবুরাপুয়া দুগই খামকরিয়া
গজানন্দর শোকসভা আহানর জুগৎ করলা। মালঠেপগৎ নিয়া মাইক ঔগ
বহেইলাগা ঔপেই মালঠেপগৎ ফুতি বুনিয়া আছিলি মৌ আগ উঠিয়া বেলা দিয়া
গেলিগা। মালঠেপগৎ বহেয়া এলা আহান বাজেইক বুলতে স্কুটার আহানল
সানশ্লাস পিদেছি গাবুরাপুয়া দুগ আয়া মাইকম্যান ঔগরে মাতলা - কালিদরেৎত
ইমে আবি জাবি এলাগ মাহেই বাজারতা কিয়াকা। ঔতা বন্ধ কর। এরে এবাকার
হিট ডাককুকে প্যার ফিলিমর এলা আনেছি ঔতা বাজা। দিলকুমারীয়ে দেছে
এলা। এবাকা দিলকুমারী কতিহান ফেমাস অছে ঔহানৌ নাজানছ থাং! ঔতা
বুলিয়া মাইকম্যান শৌ ঔগর লগে হিন্দি সিনেমাল কতহান য়ারি দিয়া স্কুটারহানল
বেলা দিয়া গেলাগা। নুয়া ক্যাসেট এহান বাজেইক বুলতে দেখতারা ব্যাটারি
নেয়ছে। এলা বাজেইতেগা কিসাদে আকসাদে শব্দ আহান নিকুলের। ট্রান্সফরমারগ
বাগিয়া আজি দশদিন অইল গাঙে কারেন্ট নেই। শোকসভাহান হাঞ্জাছি শৌ
দ্বিয়গিয়ে সাইকেল আহানল গিয়া বাজারর গ্যারেজগৎত ব্যাটারি আগল আইলাগা।
মাইকগ রহানি অকরলতাই শৌগ মাহেই পুলইলা। ঔতারমা দুগ আহান কিতাৎত
কৌলি লাগিয়া আগরে আগই ঠার দিতারা। ঔবাকা উদ্যোক্তা ঔতাই আহাং ধরিয়া
ঔতারে মালঠপগৎত নিকাল দিলা। শৌ ঔগি কাদে কাদে ঘরে গেলাগা। খানি থায়া
শৌ দ্বিয়গির মালক লকেই আয়া উদ্যোক্তা ঔতারে উচ থক করে মাতে দিলা।

এহান হাবি বাসেইতৌ মানু নাইতারা। কিহানতে করানি। এগদে মাইক
আলা ঔগই ডিলইল বুলিয়া আপত্তি করের। ঔগরে অনুরোধ করিয়া কানা নাইল।
ঔগই মাইকগ খুলিয়া নেনারকা করল ঔবাকা উপায় নাপেয়া মানু নেয়য়াও থাকা
সভার কাম অকরিক বুলিয়া সভাপতি আগ ডাহাং গেলাগা। প্রধান অতিথিগতে
আয়া বয়া আছে।

বামনগর ঘরে রাধাকৃষ্ণর ফটো আহান আছিল ঔহানাং বার বামন ঔগর

বাপক নীলুয়া এইগা মরিয়া উঠানে নিকালাছিল। ঔবাকা চরণ ছাপা আহান থাছিল। ঔহানাৎত চে-র ফুলর মালা আকেইডাল আনিয়া সভাপতি বার প্রধান অতিথি বরণ করানি অইল। উদ্যোক্তা দ্বিয়গিরমা কুংগই অকরা বক্তৃতাহান দেনা ঔতাৎত খানি তর্কাতর্কি আহান অইল তানু তানুরমা। পিছেদে লেপইলতা আগই খানি মাততই - বাকি ঔহানি আরক আগই।

তানুর বক্তব্য লয়ইল আরো সভাপতিগই মাতল - শোকনৃত্য আহান নায়াতে কিসাদে ফাংশনহান অকরতাং।

উদ্যোক্তা ঔতই মাতলা - এববাকাহানাৎ এলা নাছা দেকুরাতে কুরাং পেইতাংগা।

সভাপতিগই মাংল - হইদে, উদ্বোধনী শোক নৃত্য - শ্রীমতী বৃষভানু সিংহ বুলিয়া ইকরিয়া থই। প্রধান অতিথিগই মাতল - মোর জিলকর নাঙহানৌ দেই বেনাই। উদ্যোক্তাই ইকরলা - বৃন্দানৃত্য শ্রীমতী সুনীতি সিংহ।

এখুরুম প্রধান অতিথিগর ভাষণহান। প্রধান অতিথি লক্ষ্মীকান্ত সিংহ গিরক ভাষণহান দেনাৎ উঠিল। মাউথপিসগৎ আঙুলিগল তিনবারি দিয়া ফু আহান দিয়া অকরল - মাননীয় সভাপতি গিরক বার পুলদেছি গিরিগিথানি - বুলতে মাইকগই - কাঁয়া - আঁয়া - করে ডিগল শব্দ আহান অকরল। মাইকম্যান ঔগ সিগারেট পিনাৎ গেছিলগা ঔগরে বিসারেয়া আনলাগা। তা মাইকগ ঠিক কররি বুলতে মাইকগ সুপ ইমপানিগ অইল। চেপ্টা করিয়া কানা নাইল। কিহান করতা! আজি মিটিংহান বন্ধ করিয়া আরাক আকদিন করানি, না, মাইকগ নেয়য়াও থাক, ঝামেলা এহান ইমে আজি লইকরে বেলানি।

সভাপতিগই খালকরল - আরাক আকদিন অইলে বার তারে সভাপতিগ নাদতৌ ঠিক নেই। মাতল - এতা বেরাচেরা আর থয়া লাভ নেই। ইমে আজিয়েই লইকরে বেলেইক। মাইকগ নেয়ইল থাংতে কিতা অইল।

মাইকগ নেয়ইলতাই মালঠেপগৎ আছিল। শৌ ঔগি বেলা দিয়া গেলাগা। থাইলাতা সভাপতিগ, প্রধান অতিথিগ, মাইকম্যান ঔগ বার উদ্যোক্তা আগ। আগ বাজারে গেছেগা ধূপকাঠি আনাৎ। ধূপকাঠি নেই বুলিয়া প্রধান অতিথিগই আপত্তি করল থাংতে।

খানি থায়া প্রধান অতিথি গিরকে তার ভাষণহান অকরল। - ডাঙরিয়া সভাপতি গিরক, পুলদেছি জ্ঞানী গুণী বার ইমাইন্দল। আজি যে কবিগর শোক সভাহান লাংকরেছি ঔগর সম্পর্কে মি কিততাউ হারনাপাছু। টাউনে এম. এল. এ গর লগে উর্না অনাৎ জিংগা বুলিয়া সালছু মানুগরে খামকরিয়া আনলাতা।

যেতাউ অক, আনলা মাহেইতে মি দ্বি আককথা মাতানি মনাউরি। পিছেকার বাসহানৌ খানি ডিলছে থাংতে।

সমাজর কুনো পত্রিকাং মি গজানন্দর ইকরা নাউ দেহেছু। গজানন্দ কবি আগ বুলিয়া মিতে আজি হে হারপাউরি। যেতাউ অক, সমাজর উন্নতি করানি মনেইলে এবাকার গাই সাহিত্যহান কুন আগদে পড়িয়া থাইলৌ কিংতাউ নেই। এবাকা সমাজহান কি অবস্থাং আছে ওহান হারপানি থকর। আমারে আমি ডাঙর বুলিয়া বারনগর তলে হমেইলেগা না চলতই। এবাকা কিহান করলে হবা অইতই ওহান খালকরিয়া চেইক। গজানন্দরেউ মাতুরিতা হাবির গজে সমাজহান। যেতাউ অক আজি মি এরে সভা এহানাং আয়া নিয়াম আনন্দ পেইলু। মি উদ্যোক্তা ওতারে ধন্যবাদ দিয়ৌরি বার গজানন্দর মরেছে আত্মা ওগর সদগতি কামনা করিয়া মোর বক্তব্যহান এপেই লইকরলু।

সভাপতি গিরকে মাতল — লেইলেক আহান অপরিলাগা সভা এহানাং। অকরতে করানি থকছিলহান। আমি গজানন্দর স্মৃতিং উবা অয়া দ্বিমিনিট নীরবতা পালন করিক।

সভাপতিগই, প্রধান অতিথিগই বার উদ্যোক্তা দ্বিয়গিয়ে উবা অইলা। মাইকম্যান ওগতে বয়া থাইল। খাংতা সভাপতিগর আঙেইহানাং পেপুরা আগ হমেয়া কামাড়া বেলল। সভাপতি গিরকে ওগ মারানির বারাদে অইল।

এখুরুম সভাপতির ভাষণহান — প্রধান অতিথি গিরক বার পুলদেছি গিরি গিথানি হাবিরে হমা দিয়া মি দ্বি আকচুটি মাতিং, আজিকার যে সাহিত্যিকগর শোক সভাং এতাহাবি মানু আহেছি — ওগর সাহিত্য ওতা আমি না পাকরেছি ওহান অন্যায়হান, মি নিজে কবিতা ইকরলু ওবাকা গজানন্দরাংতৌ হবা করে ইকরলুগ। ওতা কুংগদে মাঙয়া গেলগা। পকে আকতা খেইলা। আজিকার সভাহানর উদ্যোক্তা ওতারে মাতুরিতা যেহানি আছে ওহানি নিয়া ছাপেইগা। এবাকা ইকরানি বন্ধ করেছু আরো। গজানন্দর কবিতা এতা নিয়াম দিন নাথাইতই। সুরেন্দ্র, মনোহর, লালবাবু গাছির ইকরা পত্রিকাং নিকুলের। আমার এপেইর খেলেদ্রই নানান নমুনাল ইকরেছে ওতা — গজানন্দই নুয়ারেছে। যেতাউ অক মি শোক সভাহানর সাফল্য কামনা করিয়া সভাহান এপেই লইকরলু।

উদ্যোক্তা ওতাই দাপদে আয়া মাতলা — ‘না, না। এবাকা ধন্যবাদ জ্ঞাপন’ বুলিয়া ধন্যবাদ জ্ঞাপন করিয়া সভাহান লইকরলা।

গজানন্দর স্মৃতি সভাং আহিং বুলিয়া আগ সালছে ওগরে পথে আরাক আগই খামকরিয়া মাতল — গজানন্দর কবিতাউ কবিতা থাং? মি থাইতে তারে কুংগই কবিগ বুলতারাতা, তার স্মৃতিসভাং যিতেইগাতাতে?

মাইপাকসেনার পাতাল প্রবেশ

মাইপাকসেনারে পুতকে বহকে ঘরেৎত নিকাল দিলা। দুঃখ ঔহানে দিন এহান বুলতে বুলতে ভাতর বকে পানির টাটিয়ে অয়া হেইকিরি আকজারর তলে জিরেয়া বহেছেতা। ঔবাকা খাংতা ডাঙর হেইকিরি আগ মুরগর গজে ডমকো পড়িল। ঔগর জাতাহানে মাইপাকসেনা পাতালেদে হমা গেলগা। মাইপাকসেনা আকগদেতে হারৌ অইল। সীতার পিছেদে এহান দ্বিতীয় পাতাল প্রবেশহান। সীতার সাদে এহানো যারিনাঙহান অয়া থাইতই। ঔতা বুলিয়া আহিগি মেলিয়া চার থাংতে – তা আকখুলাগ নাগই। আগেৎতৌ পাতালে মানুগ মাহেই হমেয়া গাঙ পালয়া আছি। যেতাউ অক টটরেইল মানু আছি – মাইপাকসেনা আকখুলাগ নাগই। কনাকতৌ দৌদুক ডরপারগ থাংতে আহালা আকসরগ অয়া কিসাদে থাইলইছতা এপেই।

মাইপাকসেনা বয়া বয়া খালকরেরতা জিংতা অয়া থাইতে ঠকামিছা যারিগ মাহেই ছনেছিল। স্বর্গ নরক বুলিয়া দুহান ফাম আছে মরানির পিছেদে পুণ্যবান ঔতা স্বর্গে বার পাপী ঔতা নরকে যিতারাগা। এহান ভুলহান। পাপপুণ্য বুলিয়া কিংতাউ নেই। স্বর্গ নরক বুলিয়াউ কিংতাউ নেই। অরতে আহিৎ দেহাহান নাই। আছেতাই গজ তল অর্থাৎ আটটিংগাহান বার পাতালহান। জিংতা অইতেৎত যেতাই গজেদে কানা মনেইতারা ঔতাই মরলে গজে যিতারাগা, বার জিংতা জিংতা গাতে হমানি মনেইতারা ঔতাই মরলে পাতালে যিতারাগা। খানি থায়া খিয়াল করল তারতা ভাতর বকহানৌ নেই, পানির টাটিয়ো নেই। হারপেইল তারতাতে দেহগ নেই নাই, ইমে আত্মাগ। আত্মাগরতাতে কিতার ভক, কিতার টাটি। মাইপাকসেনাই খালকরল – পাতালে হমানি এহানে টেইপাঙ জনমেৎত নুঙেই। পাতালর আত্মার গাঙ ঔতাই জিঙে মহা আনন্দ আহানাৎ পড়েছি। মাইপাকসেনা আগেদে এতা কথা হার নাপাছিল। মরিয়া পাতালে আহিল আরো বুদ্ধাহান পড়িলতা।

মাইপাকসেনার পাতাল প্রবেশ অইল দিন ঔহান কিতার অমাবস্যা আহান পড়েছে। ঔদিন পাতালর আত্মা এতাই কিতার কুমেই আহানল গইগ অছি। এগদেৎত হৌগদে ছরহার আটতারা, দাপদিতারা, ফালদিতারা, বৌহানরে আঙেইতারা। পরলেই আহান অছি সুপ চানাপা। কিতা করতারাতা বুলিয়া মাইপাকসেনা খাপাক

আকসপার হাদিত লুকেয়া চার।

পয়লা জাতীয় সংগীতহান অকরলা। আত্মা ঔতার নার ঔতা পেনপেনানি মালছে। পুলছি আত্মা ঔতাৎত আগই মাতল - বছর বছর আকহান ইকরেছে এলা ঔহানরে জাতীয় সংগীতহান করে দিয়ার। এমারি নুয়া আহান দিবাং নাই। হাবিয়ে লৌদিয়া মাতলা - এগ আমার নেতার শত্রুগ, পাতালবাসীর শত্রুগ, সমাজর শত্রুগ। এগরে নিকাল দেই। নেতার এলাহান নাকরের ঔগরে নিকাল দেই। আমার কথাল না চলের। হবা হবা নেই ঔহান নিজে খালকরানি মনার।

জাতীয় সংগীত ঔহান ছনিয়া হাবিয়ে জলে নালে অছি। জনমে আকহান ইকরেদেছে ঔহান অমর অয়া থাইল। কতিলৌ ডাঙর কবিগ অগেছেগাতা।

জাতীয় সংগীতহান লয়নির পিছেদে দীক্ষাগ্রহণ। ট্রাক তিনহানাং কুরাংত লাঠিগ মাহেই আহিল। খেদেছি আত্মা ঔগ মাইপাকসেনা লুকাছে খাপাক ঔ সপাং আয়া লুকেইলগা। মাইপাকসেনারে মাতল - তিতে নুয়াগ নাই, কুমেইহান চা। এরে তিনহান ট্রাক বুজিয়া আহিল লাঠি ঔতা আগই দান করেছেতা। জিংতা অয়া থাইতে ত্রিশূল দীক্ষা বুলিয়া ছনে থাইবে। এপেই লাঠি দীক্ষা। লাঠিগ পেইতই ঔগরে সদস্য নাবুলিয়া লাঠিয়াল বুলতাই।

মাইপাকসেনাই চার থাংতে দেহেরতা তিনহান ট্রাকেৎত রঙ তিনহানর লাঠি নিকুলিল। খেদেছি আত্মা ঔগই মাতল - তিনহান রঙর লাঠি কিতারকা হারপেইলেতা? নিয়াম উগ্র ঔতারে দিতাইতা রাঙা ঔতা। রাঙা লাঠি ধরতাই ঔতাই ঠারেয়া, কিলেয়া, লাঠিল বারেয়া শত্রু খতম করানি।

— মাংক্রামাচুর লাঠি ঔতার য়ারিহান খানি মাত

— হাই! থিংক ট্যাংক ঔতারে মাংক্রামাচুর লাঠি দিতারাতা।

— কিতারে?

— মাংক্রামাচুর লাঠিয়াল ঔতাই নিজর ঔতারে আরতার কুমেইং য়ানাহান নাদানি। চরেদে মানুর নিন্দা করানি। তানু মাততাই ঔহান আরতা হাবিয়ে হাইহান বুলিয়া য়াকরানি। যতউ শিক্ষিতগ অয়াও থাক মাংক্রামাচুর লাঠিগ পেইবেতাই বিদ্যা ঔহান কুন আগদে থয়া আকসাটে রহানি। মানুরে চিঠি দিয়া গালানি। পিছেদে চিঠি নাদেছু বুলানি।

তি হাজার করিয়াও কানা নেই। লাঠিগ লইতে বুঝলা ঔহান বুঝলাহান।

— ঔরে কাল লাঠি ঔতাতে?

— ঔতা নুয়া হমেইতাই ঔতাই ধরতাইতা।

— তানুতে?

— তানুতে গজরতাই মাততাই ঔহান হুনি। ঔরে দেহরতা দলে দলে নুয়া নুয়া আত্মা ঔতা আইতারা ঔহান।

— কিতা করতারা তা?

— তানুর মগজ ঔতা কারিয়া শ্রীচরণে কাৎকরতারা তা। এহান মরার দেশহান না। মগজ থাইলে তানুর লগে তিলো নুয়ারতেই। এপেই আরাক কতদিন থাইলে হারপেইতেই — হাবি মগজআলারে খেদে দেছি।

— তিতে কিয়া তানুর লগে নাইলে? মগজগ দেনা নাকরর থাং?

— মিতে জরম আইতেৎত মগজগ নেয়া জরম অছুগ। তানু খালকরতারা তাই মি থায়া থায়া মগজগ দেনা নাকরৌরি তা। ঔতার গজে এরে থতা এহানে মোরে মারে বেললতা। তানুর অর নার ঔতা মাতে বেলাউরি থাংতে মোরেতে বিষগ করে দেখতারা তা।

— বাসা তানুর জাতীয় সংগীতহান বুললে ঔহান কুঙ্গই লেংকরেছেহান? খানি হুয়াতা।

— হাবির গজর ঔগই লেংকরেছেহান। হু

ধরো মারো পিত কারো

নাকরতাই ঔতা মারো

হাবিয়ে একতা অয়া মোরে যাকরো॥

— লাঠি দীক্ষা লয়য়া হাবি ঘরে যিতারা গা। মিতে কুরাং থাইতৌ।

— আজি ঔরে শেউরিয়া ঔজারে থাক। মিয়ো যিংগা, কালি বার উনা আইতাঙাই নাই।

দশেৎত খেদেছি আত্মা ঔগ পিছেকার দিন আহিল। মাইপাকসেনাই আংকরল — আজিতে?

— আজিযৌ কুমেই আহান আছে। চেয়া যাগা।

হাবি লাঠিয়াল আত্মা ঔতা তিলেলা। মাপু ঔগই মাতানি অকরল — আমার নীতিহানতে হাবিয়ে হারপাছোনাই। — হৌতাই সখী, হৌতাই গোপী। বুজেয়া মাতিং বুললে থৌপুয়ে কর্মহান খানা, ভাবকে নাপানি। আগেৎত লেমে বয়া আছি ঔতাই লেমে থানা। লেমে বয়া কতি ত্যাগ স্বীকার করেছি তা তানু। লেমে থাইতাই হাইহান, কিন্তু মনেইবা লেম ঔগৎ সেচে পারতাই। কিংতাউ পারানি না লাগতই, জানানি না লাগতই। যেগই হাবিৎত নিয়াম ভুল করতাই ঔগই হাবির গজর লেমগ পেইতই। হানতে, অকরিক বেনাই।

আত্মা আগই মাতল — ভোট করিক। আরাক আত্মা আগই মাতল — না,

না, ভোট কিতা না, লটারি করিক।

—না, ভোট।

—না, লটারি।

এতাল তর্কাতর্কি চলের ঔবাকা খেদেছি আত্মা ঔগ ডরপেয়া খাংতা মাইপাকসেনার থতাহানাং হমেয়া তলর দাতসুরিং জাঙহান দিয়া গজর দাতসুরি আতহানিল ধরিয়া থাইল।

—বাসেই বাসেই। কৌলি না করিয়ো বুলিয়া মাপু ঔগই কৌলিহান থামেইল। এহান বাগিচার গাওনহান নাগই। চিকারি নাদিয়ো। হাবিতা বাদ দিয়া সিলেকশনে যিকগা।—তি জনমহান সমাজর সালে মাইর করিয়া আহরগ। তোরকা এরে লেম এগ।

এসাদে করে মানু চেয়া চেয়া লেমগি বাটিয়া অভিষেক করতারা। অভিষেকর পানির সিক ঔতা মাইপাক সেনার আহিয়েদে লাগেরগা।

—এন্না, এন্না আহিগ মেলল, আহিগ মেলল, চার, — বুলিয়া মানুগ মাহেই পুলছি ঔতাই লৌদিতারা। মেইথঙহানাং পানি সিটেইতারা আকতাই, তার থতাহানাদে দাত দ্বিসুরির হাদিং চামুচ আহান বরাদেছি। মাইপাকসেনা হেইকিরি জারর তলে পড়িয়া আছে। তারে বেরদিয়া চারিবেদে মানুহান পুলছি।

এহান হাবি দেখল এতাতে, কুরাং গেলগাতা? মাইপাকসেনা খালকরিয়া থাইল।

আকতাই মাতলা-হুশহান হবাই নাহেছে। আরাকৌ পানি ডালে দেই। গুলমকছি পুড়িয়া নাকেদে গৎ হুয়েই।

অ! মাইপাকসেনাই দেখল এতা হপনেদে দেখলতা। মুরগৎ হেইকিরিগ পড়িয়া বিনবিনি চাক দিয়া বেহুশ অয়া পড়েছে ঔপেই দেহেছেতা না। এতা মিনামপাতা, মিছাতা, কাল্লনিকতা। হাচাতা নাগই।

মাইপাকসেনা উঠিয়া বহিল। ঔবাকা আরাক হেইকিরি আগ ডম করে মুরগৎ পড়িল। এখুরুমতে হুতুমেউ মরিল। মরানির পিছেদে, কিতা অইল, কুরাং গেলগা কিগই জানে।



শক্তি সিংহ, নুয়া দিল্লি

সমাজ এহানরে ইঙাল ভাল করে দেনার কাজে, মিমামে কাকরে দেনার কাজে, সমাজব মানুরে দিক-দিশা দেনার কাজে বুলিয়া ইমা বিষ্ণুপ্রিয়া উরে যে গুণী মানু কতগ জবম নিয়াছিগা, অতারমা আগ ইলতা কবি ব্রজেন্দ্রকুমার সিংহ। 'কবি ব্রজেন্দ্র' বারো 'বিষ্ণুপ্রিয়া মণিপুরী সাহিত্য' সমার্থক বুললেউ একরের। আধুনিক বিষ্ণুপ্রিয়া মণিপুরী সাহিত্যর এরে পথিকৃৎ গিরক এগ জবম নাইলইছ আমার সাহিত্যহান যে কুরাং পড়িয়া থাইল অইছ আমি চিত্তাউ করে নুয়ারবাং। গল্প, কবিতা, ছড়া, প্রবন্ধ, অনুবাদ সাহিত্য হাবি ক্ষেত্র এতা গিরকর প্রতিভার পরশ পেয়া শিল্পিত রূপ আহাৎ গিয়া ফৌয়িলগা। সাহিত্যর মোঠেল এতা ফেমাককে বৃজা বৃজা কাৎকরে দিয়া থয়াছেতা ইমা বিষ্ণুপ্রিয়ার সাহিত্যকনুঙগৎ। ভাষণ দেনাতে গিরকর জুড়ি নেই। ১৯৯৭ সালে পইলা বাংলাদেশে আহিয়া পৌরির সেমিনার আহাৎ রবীন্দ্রনাথর গজে যে ভাষণহান দিয়াছিল অহান হুনিয়া অন্য সমাজর সুধীজন অতাউ আচানক ইয়া মাতলা, মণিপুরীগ ইয়া গিরকে যেসারে বক্তব্যহান থইল বাংলাদেশে আমি এহান করনা করানি হিনপারাং। গিরকে ডিগল বক্তব্য দিলেউ শ্রোতাই বিরক্ত নাইতারা, শ্রোতার মন আচুলে পারেরথাংতে।

কবি ব্রজেন্দ্র এবাকা ব্যক্তি নাগই, প্রতিষ্ঠান আহান। প্রতিষ্ঠান এহানে খইনাঙ জারর ডেকি বিবটি মইকই ইয়া ডেঙ পাতা সালকরিয়া, ফুলে ফুলে শোভিত ইয়া অমারে আশ্রয় দেব, হারৌ করের। এতাপরা আশ্রয় এহান থাইতে আমার কিতাব ভয়, কিতাব লাভ, কিতাব হীনম্মন্যতা!

সম্পাদকীয় : পৌরি পত্রিকা

অগ্রহায়ণ ১৪১২